

光緒江西通志

陳宗舜字邨民永新人至元閒領鄉試魁明初典江右

文衡與考會試學士解縉亦其所取者也晚家吉水以

文學爲遠近所宗

永新人物志

謝志舊案解開以下三人皆應明徵辟或已授官前志入

元今改正

戴安字伯甯永豐人洪武舉人高才博學有用世之志

三應徵辟所陳奏皆國家至計上多采納然皆以親老

乞身終養十三年復召授御史臺都事改翰林典籍復

建言十二事改廣東海北提舉卒於官

語雙江集

羅以明字善蒙自號曰矇叟吉水人七歲能詩對十二

能爲詞賦明初隱居不仕中子汝敬入翰林迎養京師

朝奉天門見皇太子於文華殿命大官賜膳歸鄉日賦

詩歌誦太平年八十二卒

謝志原案羅以明復仁從子前志不載今補

王沂字子與泰和人父以道元時有隱德不仕沂與弟佑俱試有司不合卽棄去洪武初佑舉明經除監察御史明年沂亦徵爲說書旣至上書論事授福建鹽運副使以老辭歸所著有二妙集永樂中同里蕭暉刊行於世

梁泊庵集

白志舊案

薊州府志引羅念庵集以沂爲零都人者譌

王佑字子啟泰和人與胡子祺同時爲廣西僉事按察

使尋適當咨兩人以政體子祺曰刑新國用輕典宜靜

以泄之佑曰蠻方之人瀆倫傷化不及此時明禮法示

勸懲後難治适從之廣西稱治蜀平佑徙知重慶州招

徠撫輯甚得民和坐事免官卒

白志兄弟皆未仕元人物志

謝志舊案子與

以兄沂爲明人弟佑爲元人白志據泰和梁用之所撰竹亭行狀改正

楊卓字自立泰和人洪武進士授吏部主事踰年遷廣

東行省員外郎田家婦行山中遇雨伐木卒欲亂之婦不從遂殺婦婦家得屍訴參政拷同役者二十人皆引服吏抱具獄請署卓曰殺一婦安用二十卒乎列二十人庭下熟視久之指兩卒曰殺人者汝也兩卒大驚服罪參政曰員外何以知之卓曰卒二十必善惡異也二十人遇一婦亂且不能況殺之乎參政曰善遂生十八人坐事謫鳳陽屯種召爲禮部主事改杭州通判卓未至杭時有兄弟爭田累歲不決卓至垂涕不欲訊兄竟讓弟田卓精吏事吏不能欺而爲治尙寬恕民悅服焉

病免卒

白志

劉夏字簡卿安福人洪武改元上書撰大學旨要進呈時大旱應詔言二事稱旨差往汴陝訪采前代政績筆

削成書以獻二年復差往交趾竣事沒於南甯

林志舊

案林志作劉迪簡登科考迪簡乃洪武三十年進士吉水人今從安志改作夏

歐陽韶字子韶永新人洪武初授監察御史時太祖威

斷莫測日命御史二人侍班刑賞有失中不諫正者罪

之一日韶侍班上乘怒將戮一人他御史不敢前韶趨

跪闕庭倉卒不能措辭舉手加額連呼曰陛下不可上

察其樸實天顏為霽其人得從輕典後乞致仕終於家

人物志

尹堅字潮春永新人常遇春伐江西堅知天命有歸說

熊天瑞以全城歸服擢授直殿將軍後累從征伐有功

洪武二年改授武略將軍祥符衛鎮撫予世襲

林志

錢瑛字可大吉水人祖本和以篤行稱瑛生八月而孤

元末大亂奉祖及母避難歷五六年最後遇賊縛本和瑛奔救並縛之本和哀告貰其孫瑛亦泣請代不已賊憐而兩釋之時瑛母亦被執瑛妻張氏從伏莽中窺見卽趨出謂賊曰姑老請釋而縛我賊見其年少從之旣就縛出袖中鞵與姑訣曰婦無用此矣且行且睨姑稍遠卽罵賊不肯行賊持之急罵益厲賊怒攢刃刺殺之事定有司知瑛賢凡三薦並以親老辭子遂志中進士

官山東僉事

明史
白志

梁伯興永豐人洪武初以明經舉除真定府同知善政著聞升應天府丞改知梧州府後召至京查理刑科事嘗命撰日本國詔稱旨升河南右布政使

明一
統志

李亨字觀泰吉水人洪武初以人才舉官蘇州知府有

政聲以父憂去位太祖遣使齎敕諭之有古廉潔之褒

賜米五十石鈔二百五十錠爲守服之用

林志

艾彭字伯崇吉水人洪武初以儒士授潮州同知擢東

昌知府潮人感其惠愛嘗立主侑祀於韓公廟守東昌

築隄捍江自黑龍渦至魏家灣六十里民獲安居焉

林志

劉穀字原實龍泉人洪武初以教授被徵入見是日有

星象文明之祥除監察御史屢上封事皆見納以疾去

位後出補無爲知州除水面錢均夫差門無私謁

林志

彭京字伯圻安福人洪武初以薦辟任給事中升眞定

知府有政聲令忌其嚴誣以私疏上察其冤坐令以死

調京爲河南僉事善草書得懷素法

林志

陳灌字子將廬陵人生數歲而孤旣冠覩元綱日壞去

習兵法已而寇盜蜂起遂募義勇保障一鄉陳友諒將熊天錫強禮致灌與俱至九江灌視陳氏不足與有爲去之甲辰春太祖克武昌灌因宏文館學士羅復仁詣軍門上謁遂擢湖廣行省員外郎遷大都督府經歷從徐達北征旣克泰州留灌築城不旬日告竣除甯國知府天下初定民棄詩書久灌建學延師選俊秀受業訪問疾苦百廢具舉革兼併之俗覈欺隱之籍朝廷取其戶帖頒行天下築化城等十六圩隄伐巨石作水門以時蓄洩三年代去謁告歸省卒

明史 楊東里集 謝志舊案 陳灌林志 誤確

白志
改正

曾鼎字元友泰和人祖懷可父思立並有學行元末鼎奉母避賊母被執鼎跪而乞代賊怒將殺母鼎號泣以

身翼蔽傷頂肩及足控母不舍賊魁繼至憫之攜其母子入營療治獲愈行省聞其賢辟爲濂溪書院山長洪武三年知縣郝思讓辟教社學鼎好學能詩兼工數學

明史錄
瑛傳

羅晉用泰和人弱冠父死女昆弟五人一廢疾從子一幼孤晉用刻苦奉母嫁妹爲從子婚養廢疾者已則不娶曰母老待養者繁娶則不給也迨從子有子母命之娶乃娶諸妹壻遠官者羈旅者其妻子用乏皆取給於晉用精於醫無問貧富一應之雖屢著奇效終不言利

安志

陳繼先字仲述泰和人洪武進士授御史時決獄者多弗稱上旨獨繼先所訊得情憲臺章疏奏覈皆出其手

暇輒爲文自娛一時稱爲陳古文而不名惜其文散失

存者五卷耳尋沒於官所著名橋梓前集

梁洎菴撰行狀

蕭執字子所泰和人洪武四年鄉舉爲國子學錄明年
夏至帝有事北郊召尙書吳琳主事宋濂率文學士以
從執偕陶凱等十二人人見齋所令賦詩復令賦山梔
花獨喜執作徧示諸臣時帝留意文學往往親試廷臣
執與陳觀知遇尤異以親老乞歸親歿廬墓側申國公
鄧鎮勦龍泉寇不戢執往責之鎮爲禁止邑人以安

趙儼傳

周子諒名愷以字行廬陵人洪武進士預修禮書授工

部主事與贛州劉承直同時並用有詩文二卷

吉州人文紀略

吳勤字孟勤師尹子元季盜起勤以策干吉安守臣不

見用洪武初爲武昌教授永樂初召入史館修高廟實錄號良史才書成改開封教授周定王敬禮之未幾卒年七十六勤學該博手未嘗釋卷爲詩文敏而工尤善行草書在史館時七十餘矣運筆如飛初號匡山樵者更號由翁皆以名其文集并六藝集凡若干卷

吉州人文紀略

羅性字子理泰和人博學有行誼洪武初舉於鄉授德安同知大盜糟李萬戶者捕人不獲株連繫獄者數百人性至郡有指糟李死者性辯其非是笞逐之悉出所繫與期十日得糟李卽盡貸若曹眾叩頭願盡力七日果得糟李嘗治蔬圃得窖鐵萬餘斤會方賦鐵造軍器民爭求售性曰此天所以濟民也悉以充賦秋滿赴京坐擅用棗水染軍衣謫戍西安四方老師宿儒在西安

者數十人吳人鄒奔曰合吾輩所讀書庶幾羅先生之

半年七十卒

白志

胡子祺名壽昌以字行吉水人宋資政殿學士銓十世孫陳友諒陷吉安太祖遣兵復之將殺脅從者子祺走謁帥力言不可得免洪武三年選文學士十八人授監察御史子祺與焉尋遷廣西按察司僉事屢平冤獄祠廟不載祀典者悉撤毀改知彭州都江諸堰秦守李冰所鑿導江水灌成都田歷代皆用鐵石修之勞費不資元季兵興堰廢田不治子祺議以竹木代工甚省遷延平知府踰年卒次子廣自有傳

明史胡廣傳
白志

周肅吉水人洪武初舉授御史臺都事直諫稱旨受文綺楮幣之資累官戶部尙書經畫悉當上甚器重之

林志

張衡字子平萬安人洪武進士授禮科給事中疏奏剴切擢禮部左侍郎奏正洪武禮儀定式歲行郊祀選百官行最者十三人登壇分獻衡與焉太祖屢嘉其清慎以其事載大誥每宣召輒呼爲瘦張而不名

林志

杜環字叔循廬陵人侍父一元游宦金陵遂家焉好學工書重然諾父執兵部主事常允恭歿於九江允恭母張無所歸念允恭嘗仕金陵故交或有存者問至一元家一元前卒見環道故環扶就坐呼妻孥出拜敬養備至會歲大饑民不自保張見環貧冀再出依戚友無應者環迎事之如初越十年環以贊禮郎奉詔祠會稽道遇其幼子伯章泣語母在環家念子成疾宜歸視母伯章遲半載始至一至復逸去不顧後張卒爲殯葬如禮

歲時祀之環後爲晉王府錄事

宋文憲集

王希禮吉安人洪武中知平陽不事綜刻催科讞決章

鞭示扑常曰刑者輔政之法不得已用之民自化服

通志

彭豫字與志泰和人洪武中爲香山丞地僻俗囂前令

率尚威嚴豫至寬教令省刑罰廢墜具舉流亡來歸海

濱屯帥暴橫悉遣還教民樹柵積石以禦倭寇寇不敢

近俗蓄蠶毒豫廉得之誅徙其家後莫有犯卒於官

通志

習韶字尙鏞永豐人洪武中知長樂以孝弟化民勤於

撫字民安其業秩滿遷兵部郎爲詩古澹清婉解縉梁

寅俱極推之

蘇雙江集 謝志舊案 習韶舊志不載今補

劉煥字孟章吉水人洪武初以明經舉知原武縣上書首陳時務禁民掘冢時適祭無祀鬼神有大搖尾而前叱逐不去乃命左右隨之至蒿野中見二人掘冢獲而訊之伏罪後以薦擢吏部郎中

人物志

艾實字用濟吉水人洪武初應制進太學賦稱旨授周府長史懇辭還鄉治別業於符山下著有邯鄲集稽古

錄

安志

周靜安福人洪武初舉學行授鈔庫提舉以伉直謫戍畢節居夷十八年益厲節操適詔選老成人諭榜葛刺國起授行人持節往淹留七載始遣陪臣伴歸至潮陽卒所著有滇南集

安志

伍朝賓字介貞安福人洪武初以遺逸徵試惟天生民

有欲論敷對稱旨令供奉翰林文字除國子助教弟朝
作亦有詩名

安志

尹平字伯洪吉水人洪武中驛召至京授考功監丞改
刑科都給事中又改御史彈劾不避權貴奉命巡視湖
廣詢察民隱考覈官吏所至風采卓然後以忤旨下獄

卒

林志

歐陽銘字日新泰和人以賢才薦除江都縣丞兵燹之
餘民死徙十七八銘招徠拊循漸次復業民有繼母告
其子不孝者呼至案前委曲開譬母子泣謝去遷知臨
淄縣副將軍常遇春過臨淄卒入民家取酒相毆擊一
市盡譁銘笞而遣之卒訴令罵將軍將軍召詰之銘曰
卒王師民亦王民也民毆且死卒不當笞邪將軍意解

爲責軍士以謝已而大將軍徐達至軍士相戒曰是嘗抗常公健吏也毋犯銘爲治廉靜平恕暇輒進諸生講文藝或單騎行田閒視民耕穫勤惰勸勵之邑大治秩

滿入覲卒

白志 原案歐陽銘林志失載
王文端公集有傳與此略同

劉亨字嘉會廬陵人洪武中舉經明行修說書於華蓋殿以言事忤執政出爲壽州訓導嘗上言文武並用之道升武進縣丞縣民李德懋等作亂亨謀於守令禽首惡戮之而諭降其黨事聞資金幣旋以事罷歸宣德中復以薦入朝自言年將八十不足任事聽還鄉自便又數年卒所著有竹軒寫心二集隨遇錄凡若干卷上抄本余詮吉安人洪武十五年以明經老成爲禮部主事劉庸所薦召至京詮年踰七十賜坐顧問翌日命爲文華

殿大學士以老疾固辭遂放還

明史吳伯宗傳

劉于字允恭永豐人幼嗜學年稍長以文謁虞集集深器之至正七年舉於鄉以下第恩例署泰和州學正秩滿還鄉洪武初再徵至京師厯考福建廣東鄉試得士爲多嘗召見敷繹經傳上爲首肯欲授以州邑之職年老固辭賦詩以見志遂放歸

宋學士集

伍洪字伯宏安福人洪武進士授績溪主簿擢上元知縣丁外艱服闋以母老須養不復仕推資產與諸弟而已獨隱居養母十九年有異母弟得罪而逃使者捕弗獲執其母洪哭訴求代母曰汝往必死莫若吾自當之洪曰安有子在而累母者使者執以行竟死於市

白志

阮友彰廬陵人洪武初官福建按察使以廉幹稱左遷

河南尋謫戍復起爲交趾副使交趾久違聲教甫內屬
友彰至未三月政令大行

林志

劉仕貆字伯貞安福人父開閨兄閨弟閨閨皆以春秋
應舉爲元官獨閑不仕著書終其身仕貆少受父學紅
巾亂避地邑南社州洪武十五年應賢良舉授廣東按
察司僉事分司瓊州州在海外民夷錯居俗獷悍不可
繩以法且善蠱上官至輒致所產珍貨爲贄受則喜以
爲無猜嫌不受則懼禍蠱殺之仕瓊者悉爲所汙仕貆
廉且惠愛輕徭理枉大得民和雖卻其贄夷人不忍害
也朝議省僉事官改授東莞河泊使發憤得疾遭風歿
於水

白志

蕭岐字尙仁泰和人五歲而孤事祖父母以孝聞有司

屢舉不赴洪武十七年詔徵賢良強起之上十使書大意謂帝刑罰過中訐告風熾請禁止實封以杜誣罔依律科獄以信詔令凡萬餘言召見授潭府長史力辭忤旨謫雲南楚雄訓導岐卽日行遣騎追還歲餘改授平涼再歲致仕復召與錢宰等考定書傳賜幣鈔給驛歸嘗輯五經要義又取刑統八韻賦引律令爲之解合爲一集嘗曰天下理本一出乎道必入乎刑吾合二書使觀者有所省也學者稱正固先生子忠幼被掠臨洮百戶何氏收爲壻岐自平涼歸遇於道攜還家其後遂爲

顯族

明史
白志

陳謨字一德泰和人幼能詩文邃於經學旁及子史百家涉流探源辨析純駁犁然歸於至當隱居不求仕而

究心經世之務嘗謂學必敦本莫加於性莫重於倫莫先於變化氣質若禮樂刑政錢穀兵甲度數之詳亦不可不講習一時經生學子多從之游洪武初徵詣京師賜坐議禮學士宋濂待制王禕請留爲國學師謨引疾辭歸屢應聘爲江浙考試官著書教授以終

明史

余師延

一作斯延

泰和人自少力學從元進士劉雲章授書

洪武初徵至京師以老病告歸長子學夔永樂二年進

士所居名果確齋

梁伯庵集

梁蘭字庭秀泰和人贊善潛之父有樂畦先生集鄒仲

熙稱之云隱居樂道其詩沖淡閒雅有自得之致

梁伯庵集

劉季道吉水人洪武中爲起居注首發御史大夫陳甯奸狀嘗侍東宮閱書東宮方視楊太真畫像季道手裂

之隨駕中都上賦清流關詩命和季道援筆立就有治
定不教生縱逸功成猶遣厯開關之句上嘆賞曰此詩
有安不忘危之意賜白金文綺升浙江按察司僉事發
摘陰伏機敏如神尋以剛直忤權貴下獄死

林志

王伯貞泰和人以經術顯洪武十五年以明經聘至京
師應詔者五百餘人伯貞對第一授試僉事分巡廣東
雷州復呂塘廢渠清鹽法會罷分巡官召還爲戶部主
事以父喪服闋不時起謫居安慶建文初復以薦知瓊
州崖州黎相仇殺以反聞且用兵伯貞捕其首惡兵遂
罷瓊田歲常三穫以賦軍軍不時受俟民乏乃急斂以
要利伯貞爲立期三輸之弊始絕居數年大治流民來
歸者萬餘憂歸卒於家

明史王
直傳

黃鼎字玉鉉吉水人修辭立言必以道德仁義爲本胡廣鄒緝皆其門人所著有四書五經精義

白志

楊偉字季真永新人性狷介博通五經尤精天文地理之學嘗取尺紙作廣輪圖山川曲折郡邑遠近如指諸

掌

白志

楊引吉水人好學能詩文爲宋濂陶安所稱駙馬都尉陸賢從受學入朝舉止端雅太祖喜問誰教者以引對立召見賜食他日賢以喪服見引太息曰是其心易我不可久居此矣復以纂修徵亦不就其教學者先操履而後文藝嘗揭論語鄉黨篇示人曰吾教自有養生術安事偃仰吐納爲乃節飲食時動息迄老視聽不衰旣歿安福劉球稱其學探道原文範後世去就出處卓然

有徐穉陶潛之風

明史

周渠

一作矩

字仲方洪武進士爲翰林侍從事必師古出

爲中牟令有異政遷台州同知謫於戎伍廬陵李昌祺
自陳有志經學願得渠爲師起爲廬陵司訓夏原吉薦
同治水蘇松磚石不給渠命拆塔爲之中有碑云此塔
逢周破以經義治水有聲

林志

劉伯完字觀靜吉水人洪武初舉茂才通占卜課候術
數之學里中何監正奇其技薦於御史臺劉連值朝廷
雅重天文諸儒詔授陰陽學正歷欽天監兼回回監副

迨靖難兵起遂變姓名遠遁後不知其所終

人物志

周鳴字岐鳳吉水人洪武中以經明行修薦爲桐城訓
導改卽墨簿會軍興賦鐵七十餘萬鳴具言海隅非產

鐵之地民力用甦永樂初授國子學正擢漢府紀善王素蓄不臣之心開寶賢堂招致匪人爲奪嫡計鳴心知之作寶賢堂箴寓規意王忌之送鳴於京師下錦衣獄仁宗時以太子監國知其以諫得罪改長洲儒學升國子博士終職方員外郎

分省人物考 謹案謝志周鳴下有宋禮永甯人攷明史係河

南永甯非江西也今刪

鄒瑾魏冕俱永豐人洪武末瑾以薦辟官至大理寺丞掌御史事冕爲瑾之甥同官御史靖難兵至與十八人同謀死守時都督徐增壽謀開城迎納十八人卽殿前毆之幾死帝輟朝瑾與冕大呼曰願速加誅臣等義不與之俱生次日宮中火起有勸冕降者厲聲叱之遂自殺瑾亦死南渡後贈瑾大理卿諡貞烈人稱永豐二烈

國朝並賜諡節愍

明史廖昇傳

吉州人文
勝朝殉節諸臣錄

曹居真廬陵人著詩義發揮行於世采入詩經大全學

者宗之

林志

藍子真吉水人洪武中試天下第一厯官副都御史以

直聲聞於時

人物志

劉埜字子彥崧之弟洪武中徵制禮作樂通今博古之

士輦守舉埜以應條奏十事禮樂多所更定

林志

夏霖字道存吉水人洪武間以文學徵爲本郡教授博

學有行誼沒配祀九賢堂有荷亭金灘等集

人物志

黃九衢字伯路吉水人博學多才識所製渾天儀刻漏

壺曲盡其巧爲本縣訓導守令每造請問以禮樂原委

九衢一一折衷皆可施行

人物志

郭餘字慶宜泰和人洪武閒徵論道之士應詔授廣東按察僉事著有禹貢傳注詳節

林志

鄒朴字爾愚永豐人以儒官仕周府直言諫王以止其非謀王不聽禁錮甚密後謀逆事覺大臣以朴諫語聞上嘉其忠特升爲監察御史尋升秦府長史歸省聞從弟瑾死靖難之節憤激不食而卒

林志府志

曾鳳韶廬陵人洪武進士建文初爲監察御史燕王入覲馳御道入且不拜鳳韶侍班劾大不敬以至親不問燕兵起朝議遣使持詔往諭鳳韶慷慨請行比至燕抗不納乃還燕王稱帝以原官召不赴又以侍郎召知不可免乃刺血書衣襟曰子生廬陵忠節之邦素負剛鯁之腸讀書登進士第仕宦至繡衣郎慨一死之得宜可

以含笑於地下而不愧吾文天祥屬妻李氏子公望勿
易我衣卽以此殮遂自殺年二十九李亦自經死福王
時贈太僕卿諡忠毅妻諡貞愍

國朝賜諡忠節

明史黃鉞傳 白志
賜朝殉節諸臣錄

梁潛字用之泰和人洪武閒舉鄉試授四川蒼溪訓導
以薦除廣東四會知縣縣有龍橋河吏廉平則河水清
自潛至迄去水可鑑永樂元年召修太祖實錄書成擢
翰林修撰賜白金襲衣文幣兼右春坊右贊善代鄭賜
總裁永樂大典

白志 謝志舊案梁潛榜姓鍾後復本
姓爲梁人物志既載梁潛又載鍾潛白

志考正存其一又案仁宗爲太子
監國時潛居輔導後以諫死

蕭翀字鵬舉以字行泰和人洪武辛酉以賢良應制賦
指佞草詩稱旨授蘇州同知山東鹽運副使以勤儉廉

介稱後以子鉉貴贈太子太師

林志謝志舊案蕭

皆不及其兄弟劉子高職方撰五刑傳則稱其同祖五
人長紳次璉次紳次璉次璉次璉次璉次璉次璉次璉次璉
瑞顧不及紳之宦績豈同時同邑別有同姓同名者乎
抑或一人而彼此所述各異辭乎白志據林志立傳

朱如初萬安人辟舉不就居親喪不用浮屠一遵家禮

洪武間西境寇發官兵圍寇境畫地圖頗干無辜如初

白縣令當區別善惡或曰圖成難改如初號哭碎首曰

畫地之功與萬安人之命孰重輕令遂改圖良民幸免

林志

王省字子職吉水人洪武鄉舉至京免會試命吏部授

官省言親老乞歸養尋以文學徵太祖親試稱旨當殊

擢自陳才薄親老乞便養授浮梁教諭凡三爲教官最

後得濟陽燕兵至省坐明倫堂伐鼓聚諸生謂曰若等

知此堂何名今日君臣之義何如因大哭諸生亦哭省
以頭觸柱死女靜適卽墨簿周岐鳳聞燕兵至濟陽知
父必死三遣人往訪竟得遺骸歸葬福王時贈禮部員
外郎謚貞烈

國朝入祀忠義祠

明史 白志 勝朝殉節諸臣錄 白

濟陽失守閉門不食數日死與此小異吉州人文紀略
云省子頑爲夔州通判亦抗節死攷墓志省三子曰詰
日善曰茲永
無名頑者

解縉字大紳吉水人父開與弟闔有名稱二解縉年十
九舉鄉試第一洪武二十一年與兄綸同舉進士授中
書庶吉士上封事萬言帝稱其才改御史時詔近臣父
皆得入覲縉父開至帝召謂曰大器晚成若以而子歸
益令進學後十年來大用未晚也太祖崩縉入臨以違

詔謫河州衛吏部侍郎董倫薦爲翰林待詔成祖入京
擢侍讀命與黃淮楊士奇胡廣金幼孜楊榮胡儼七人
並直文淵閣預機務尋進侍讀學士賜五品服命七人
命婦朝中宮縉等妻遂謁后於柔儀殿賜冠服鈔幣而
出永樂二年立皇太子進縉翰林學士兼右春坊大學
士縉少登朝才高任事直前好臧否鯁直無顧忌廷臣
多害其寵以定建儲議忤漢王卒用此謫廣西參議改
交趾尋逮下獄死成化元年復官贈朝列大夫綸官御
史性剛直改應天教授

明史
列卿錄

陳誠字子魯吉水人洪武進士初授行人司出使安南
卻其餽送銀幣復命升翰林院檢討建文朝出爲廣東
參議永樂初謫居撫州踰年起爲吏部主事晉員外郎

時西域撒馬兒罕哈烈等國皆遣使入貢命誠往報凡
所涉歷錄爲西域志使還上之升本司郎中累官布政
使參政凡三使西番皆不辱命洪熙中以老告歸所著

有竹山集

白志

宋琮泰和人洪武三十年會試第一北士無預者琮善
易學悵然語人曰翰苑當有阨吾其竄乎旣而諸生上
言劉三吾白信蹈等南人私其鄉帝怒命侍講張信等
覆閱不稱旨有言信等故以陋卷呈由三吾等屬之也
帝益怒信蹈等論及三吾以老戍邊琮亦遣戍帝親策
問更試擢六十一人皆北士時謂之南北榜又曰春夏
榜云永樂初赦還起刑部檢校鄉人楊士奇輩貴顯琮
無所攀援宣德中以檢討掌助教事卒之前預剋死期

或叩以休咎輒不應

白志

尹昌隆字彥謙泰和人洪武中進士及第授修撰改監察御史建文元年京師地震昌隆疏言奸人執政陰盛陽微謫見於天執政大怒斥爲福甯知縣燕兵南下昌隆上書言今事勢日去然北來奏章動引周公輔成王不若罷兵息戰許其入朝彼旣欲伸大義於天下不應便相違戾設有蹉跌便須舉位讓之猶不失作藩王若沈吟不斷禍至無日進退失據雖欲求爲丹徒布衣不可得矣不報永樂二年擢左中允改禮部主事初帝欲立高煦爲太子金忠力爭帝以問昌隆昌隆以忠言爲是帝不能奪而心銜之尋爲尙書呂震所誣逮下獄遇赦復官後數年谷王謀反事發辭連昌隆詔公卿雜問

昌隆辯不已震折之獄具置極刑死夷其族

明史白志

曾麟字子貞廬陵人洪武中以薦授靖安訓導考滿入朝除周府紀善以忠直事王世子以下皆敬憚之號爲直素先生王以罪被逮麟深白愆至丹陽遂自殺世以賈誼死梁事比之後與同宗侍御鳳韶並祀於二忠祠

林志

鄒緝字仲熙吉水人洪武中舉明經授星子教諭建文時入爲國子助教成祖卽位擢翰林侍講立東宮兼左中允屢署國子監事永樂十九年三殿災詔求直言緝上疏大略言國家所恃以久長者惟天命人心而天命常視人心爲去留今天意如此不宜勞民當還都南京奉謁陵廟告以災變之故保養聖躬休息於無爲毋聽

小人言復有所興作以誤於其後也書奏不省時言者多斥時政帝怒謂其謗訕侍讀李時勉侍講羅汝敬俱下獄御史鄭維桓何忠羅通徐瑤給事中柯暹俱左官交趾惟緝與主事高公望庶吉士楊復得免罪進左庶子兼侍講卒於官緝博極羣書居官勤慎清操如寒士子循宣德中爲翰林待詔

明史

周是修名德以字行泰和人洪武末舉明經爲霍邱訓導太祖問家居何爲對曰教人子弟孝弟力田太祖喜擢周府奉祀正改衡府紀善留京師預翰林纂修燕兵渡淮與蕭用道上書指斥用事者京城失守留書別友人江仲隆解縉胡靖蕭用道楊士奇付以後事具衣冠爲贊繫衣帶閒入應天府學拜先師畢自經於尊經閣

年四十九初與士奇縉請金幼孜黃淮胡儼約同死惟是修竟行其志云

國朝賜諡忠節

明史 勝朝 殉節諸臣錄

王處敬廬陵人少貧篤志於學洪武中官至湖廣僉事謫交趾尋復原職平生剛毅與人不苟合至老不渝

林志

周召字公明吉水人洪武初被薦爲教官召預纂修廷

試大明一統賦稱旨擢第一有溪園集

林志

劉子敏名祿泰和人洪武間拜監察御史歷官廣東副

使有學識鯁亮無阿百折不挫

人物志

曾克偉泰和人由進士任刑部主事嘗同御史按治福

建政肅民安特被獎資進山東僉事分巡遼東

林志

羅恢字師程永豐人初爲崇仁司訓嘗上疏言孔廟從

祀當以有若居十哲位次而宰我居兩廡公伯察宜斥
從祀疏奏不報永樂中膺薦入史館纂修太祖實錄升
國子學錄遷博士以年老致仕所著有歸田錄寫心稿

周文
襄集

康彥民字忞窗泰和人洪武進士先知青田調儀真後
歷巴陵以憂歸服除補天台政尚教化勸民務本力農
著有論士民書萬餘言未幾罷歸宣德初巡按御史至
天台邑民二百餘人言彥民公廉有爲乞復召爲縣御
史以聞遂再莅天台治狀爲浙第一中蜚語謫江甯丞

卒諸縣各祠名宦

明史高斗南
傳豫章書

顏伯瑋名瓌以字行廬陵人唐魯國公眞卿後建文元
年以賢良徵授沛縣知縣李景隆屯德州沛人終歲輓

運伯瑋善規畫得不困會設豐沛軍民指揮司乃集民兵五千人築七堡爲備禦計尋調其兵益山東所存疲弱不任戰燕兵攻沛伯瑋遣縣丞胡先聞行至徐州告急援不至遂命其弟珏子有爲還家侍父題詩公署壁上誓必死燕兵夜入東門伯瑋冠帶升堂南向拜自經死有爲不忍去復還見父屍自刎父旁

國朝賜伯瑋諡忠節

明史 勝朝殉節諸臣錄 白志舊家福王時伯瑋贈太僕少卿諡忠惠

有爲諡孝節

王艮字敬止吉水人建文二年進士對策第一貌寢易胡靖艮次之又次李貫三人皆同里並授修撰如洪武中故事設文史館居之預修太祖實錄總集類要時政紀諸書一時大著作皆綜理之燕兵薄京城艮與妻子

訣曰食人之祿者死人之事吾不可復生矣解縉吳溥
與艮靖比舍居皆集溥舍縉陳說大義靖亦憤激慷慨
艮獨流涕不言三子去溥子與弼尙幼嘆曰胡叔能死
是大佳事溥曰不然獨王叔死耳語未畢隔牆聞靖呼
外喧甚謹視豚溥顧與弼曰一豚尙不能舍肯舍生平
須臾艮舍哭伏鴆死矣

國朝賜諡忠節

明史 勝朝殉節諸臣錄 白志舊案建

艮爲洪武進士蓋緣成祖
卽位廢建文年號故也

彭與明萬安人太學生選授兵科給事中升大理寺丞
持風裁喜談兵事會燕師起擇督察諸將帥者眾推與
明遂出淮西至靈壁而何福已戰敗與明被執文皇縱
歸令傳語中朝士與明裂冠冕棄官變姓名遁去不知

所終人物志

楊士奇名寓以字行泰和人建文初修太祖實錄以史才薦召入翰林充編纂官尋命吏部考第史館諸儒尙書張統得士奇策曰此非經生言也奏第一成祖卽位改編修已簡入內閣典機務厯進左諭德帝北巡士奇留輔太子太子喜文辭贊善王汝玉以詩法進士奇曰殿下聽治暇當留意六經否則觀兩漢詔令詩小技不足效也太子稱善帝還南京召士奇問監國狀士奇以孝敬對十二年帝北征士奇仍輔太子居守漢王諧太子急帝還以迎駕緩盡徵侍讀黃淮等下獄士奇後至宥之十四年帝已盡得漢王事削兩護衛處之樂安進士奇翰林學士兼故官二十年復坐輔導有闕下錦衣

獄旬日而釋仁宗卽位擢禮部侍郎兼華蓋殿大學士尋進少保與同官楊榮金幼孜並賜銀章得密封言事修太宗實錄充總裁官宣宗卽位修仁宗實錄仍充總裁宣德元年漢王反帝親征平之師還次獻縣單家橋侍郎陳山迎謁請乘勝襲彰德執趙王士奇曰太宗皇帝三子今上惟兩叔父有罪者不可赦其無罪者宜厚待之疑則防之使無虞而已何遽加兵傷皇祖在天意乎時惟楊溥與士奇合帝曰吾欲封羣臣章示王令自處何如士奇曰善更得一璽書幸甚於是發使奉書至趙趙王得書大喜泣曰吾生矣卽上表謝且獻護衛言者頓息帝嘗微行夜幸士奇宅士奇倉皇出迎頓首曰陛下奈何以社稷宗廟之身自輕後數日果獲二盜有

異謀帝召士奇告之故且曰今而後知卿之愛朕也帝
初卽位內閣臣七人陳山張瑛以東宮舊恩入不稱出
爲他官黃淮以老致仕金幼孜卒閣中惟士奇榮溥三
人宣宗崩英宗方九齡軍國大政太皇太后遣中使詣
閣諮議然後裁決正統初朝政清明士奇等之力也三
年進少師歸省墓未幾還以老疾在告卒年八十贈太
師諡文貞次子璉以蔭補尙寶丞成化中進太常少卿

明史

胡廣字光大吉水人子祺子建文二年廷試第一更名
靖授翰林修撰成祖卽位廣偕解縉迎附擢侍講復名
廣遷右庶子進翰林學士兼左春坊大學士帝北征與
楊榮金幼孜從素召對帳殿廣善書每勒石皆令書之

進文淵閣大學士禮部郎中周訥請封禪廣言其不可
遂不許奔母喪還朝帝問百姓安否對曰安但郡縣窮
治建文時奸黨株及支親爲民厲帝納其言永樂十六
年卒年四十九贈禮部尙書謚文穆文臣得謚自廣始
官其子種爲翰林檢討仁宗卽位加贈廣少師

明史

鄧時俊字仲清永豐人建文進士任刑科給事中以直
諫出爲驛丞者再後入預修大典升主事卒

林志

蕭用道泰和人建文中舉懷才抱德詣闕試文章擢靖
江王府長史召入翰林修類要燕師渡淮與周是修同
上書指斥用事者永樂初預修太祖實錄改右長史從
王之藩桂林作端禮體仁遵義廣智四門箴以獻後以
疾乞歸卒於家

白志 謹案明史用道以疾乞歸
成祖忽貶宣府鶴兒嶺巡檢卒

劉鎬字武性龍泉人父允中廣西憑祥司巡檢歿於官
其地在廣西窮處與交趾接境鎬以不得歸父骨爲恨
鄉先生晏彥文知而憐之爲言於廣西當事聘爲臨桂
學導假以公事往憑祥鎬至求之客冢中莫可辨識允
中在任時所養家童劉四者旣轉入交趾一夕四忽從
墓來若有物憑之者因得其處啟視衣衾宛然又刺血
驗之誠是遂負父骨歸葬

分省人物考 謹案謝志鎬下有張彥方傳彥方係浙江

龍泉人官樂平知縣已入宦績錄此刪

王雅字格非吉水人德化訓導永樂間爲會試房考得
曾榮等皆知名之士升司經局正字尋遷翰林檢討預
修兩朝實錄性樂恬退未嘗一及貴勢之門

林志

曾榮字子啟永豐人永樂二年廷試第一授翰林修撰

尋詔解籍選進士二十八人進學文淵閣榮爲首司禮
監月給筆墨紙光祿給朝暮饌禮部月給膏燭鈔工部
擇近第宅居之帝嘗親試天馬海青歌榮援筆立就又
嘗摘記載諸隱僻事問榮條對無遺誤由是見褒寵有
薦文士者帝必問才學如榮否或命就榮辨論以觀其
能修永樂大典爲副總裁進侍讀學士修天下郡邑志
復爲副總裁仁宗立除左春坊大學士宣宗立進少詹
事預修三朝實錄再扈北巡三典會試爲文如源泉一
瀉千里館閣中自解胡後諸大制作多出其手宣德七
年卒於官年六十一贈禮部左侍郎諡襄敏

列卿錄

李湘字永懷泰和人永樂中由國學生理刑都察院以
才擢東平知州城東有大邨塢源山岱嶽雨潦輒爲民

患奏發丁夫隄之州及所轄五邑地多荒蕪力督民墾
闢公私皆實會舊官還任將解去民羣乞於朝帝從其
請時數北征令山東長吏督民轉餉道遠多死亡惟東
平人無失所奸人誣湘苛斂民財計於布政司縣民千
三百人走訴巡按御史暨布按二司力白其冤耆老七
十人復奔伏闕下發奸人誣陷狀及布政司繫湘入都
又有耆老九十人隨湘訟冤通政司以聞下刑曹閔實
乃復湘官抵奸人於法莅州十餘年擢懷慶知府居三
年卒

明史

田南畝永豐人永樂鄉舉知奉化性資寬厚操行廉謹
刑罰不妄施惟以禮訓人遭疾且殆父老入視言不及
他惟問汝有麥食否念民如此卒於官

浙江通志

周彥奇名正吉水人永樂初授刑科給事中升雲南僉事會麓川緬甸蠻苗忿爭相仇殺彥奇匹馬深入其地宣布國威諭以禍福皆解去升大理少卿讞訟能推極

幽隱

白志

周述字崇述吉水人永樂二年與從弟孟簡並舉進士及第帝手題二人策獎賞之並授翰林編修讀書文淵閣述嘗扈北巡累進左春坊諭德仁宗卽位命從皇太子謁陵南京宣宗時進左庶子正統初卒官孟簡在翰林二十年始遷詹事府丞山爲襄王長史有言宜留備顧問者帝曰輔朕弟尤勝於輔朕也述溫厚簡靜未嘗疾言遽色文章雅贍孟簡謙退不伐生平無睚眦於人並爲世所重云述著有東墅集孟簡著有竹澗集

白志

宋子環字文瑩廬陵人永樂進士選庶吉士歷考功郎中從師達采木湖廣以寬厚得眾心仁宗卽位授梁府右長史改越府和易澹泊居兩府皆有賢聲宣德中卒官家具蕭然事聞給舟歸喪所著有詞林藁梁園集白志王詢永豐人永樂進士任韶州推官明察精敏不畏權要以經術潤飾吏事時中官鄭和齎金幣勞賜海外諸番護行軍官頗橫捕韶民三人以去家人呼號贖以金不許詢至舟徑取以歸

廣東通志

張景良永新人永樂閒授國子博士進四書直講授右春坊司直郎判順慶以東宮嘗授學於景良取府所斂民金五百兩遺之景良受焉悉以還前所斂之民或難之曰孰若先拒可以博廉名景良謝曰斯皆吾民膏脂

也豈忍借是以沽廉哉

人物志

周忱字恂如吉水人永樂進士選庶吉士成祖擇其中二十八人令進學文淵閣忱自陳年少乞預帝嘉其有志許之尋擢刑部主事進員外郎忱有經世才浮沈郎署二十載人無知者獨夏原吉奇之宣德初有薦爲郡守者原吉曰此常調也安足盡周君帝以天下財賦多不理而蘇州一郡積逋至八百萬石思得才臣往釐之乃用大學士楊榮薦遷忱工部右侍郎巡撫江南總督稅糧初太祖平吳盡籍其功臣子弟莊田入官後惡富民豪并坐罪沒入田產皆謂之官田按其家租籍征之故蘇賦比他府獨重官民田租共二百七十七萬石而官田之租乃至二百六十二萬石民不能堪時宣宗屢

下詔減官田租忱乃與知府況鍾曲算累月減至七十
二萬餘石他府以次減民始少甦置濟農倉定爲條約
終忱在任江南數大府小民不知凶荒兩稅未嘗逋負
忱之力也正統初九載秩滿進左侍郎六年命兼理湖
州嘉興二府稅糧忱素樂易旣久任江南與吏民相習
若家人父子每行邨落屏去騶從與農夫餉婦相對從
容問所疾苦嘗詣松江相視水利見嘉定上海閒沿江
生茂草多淤流乃濬其上流使崑山顧浦諸所水迅流
駛下流之壅遂盡滌暇時以匹馬往來江上見者不知
其爲巡撫也再以九載滿進戶部尙書尋以江西人不
得官戶部乃改工部仍巡撫景泰初還朝言官交章劾
忱帝素知忱賢但令致仕命李敏代之敕無輕易忱法

民思忱不已卽生祠處處祀之四年卒謚文襄

明史

彭連字汝器以字行安福人永樂進士授翰林修撰時年二十餘學問文章已冠時輩駕幸北京與扈從之列歷官翰林學士卒年三十三所著有扈從五雲二稟石集

劉敬字子欽吉水人永樂癸未舉江西鄉試第一明年會試復第一時所取四百七十三人太宗拔二十八人爲庶吉士敬在選中賜名俾入文淵閣讀中祕書仁宗嗣位命經術之士謫居戍伍者舉任教官時曾榮爲翰林學士以敬應詔起爲新淦縣學訓導生徒多所造就歲滿致仕歸卒年八十有八

分省人物考 白志舊案

今增考登科錄曾榮榜進士有劉子欽吉水人又有劉子敬廬陵人而無劉敬人物考所云敬在庶吉士選中

賜名云云者疑子欽初以字行而後賜名敬也郡縣志均云子欽官主事與人物考又不合謹案敬傳疑有闕文

陳士啟名雷以字行泰和人永樂進士選庶吉士擢禮部郎中尙書呂震險忤屬吏皆憚之承奉唯謹士啟獨不少徇永樂十二年吏部言布按二司多缺官簡廷臣賢能者用之諸曹郎給事中出爲監司者二十餘人士啟得山東右參政盡心吏事不爲察察名青州饑疏請賑之粟使至而饑民倍士啟復上疏先出粟與民謂使者曰有罪吾獨任廷議竟從之坐唐賽兒亂下獄數月釋還職高煦謀不軌士啟密聞於朝煦既執從薛祿張本錄餘黨撫安人民事竣命清理山東軍籍宣德六年

卒於官

明史

楊相字之宜泰和人永樂甲申會試第一以庶吉士入

讀中祕書天資闡爽文學疏通朋輩鮮與之匹任刑部

主事卒

明一統志 謹案分省人物考載劉敬永樂甲申會試第一此又云甲申會元必有一誤

周源吉水人永樂鄉舉知天台縣時鹽禁方嚴賦無所

出民多流移源奏免其賦復業者四百餘戶升常州知

府比至縱囚出外舍約期聽理無一亡去者值歲大歉

朝廷敕重臣賑濟源建白借運兌糧以濟之

人物志

蕭寬字雅容吉水人永樂進士選庶吉士與修永樂大

典授兵部主事累官湖廣左布政使爲人寬容端重未

嘗見其有疾言遽色所至有聲

明一統志

余學夔字一夔泰和人永樂進士由翰林庶吉士預修

永樂大典授編修升侍講兩朝實錄成當遷上疏致政

去應聘主考廣東稱得人所著有北軒集

豫章書府志

陳衡永豐

一作永新

人永樂進士授御史厯巡按廣東河南

陝西風裁表著秩滿自引去

人物志

李昌祺名禎以字行廬陵人永樂進士選庶吉士預修永樂大典僻書疑事人多就質擢禮部郎中選廣西左布政使坐事謫役洪熙元年起故官河南與右布政蕭省身繩豪猾去貪殘疏滯舉廢救災卹貧政化大行憂歸宣宗已命侍郎魏源代時河南大旱廷臣請起昌祺奪喪赴官撫恤甚至正統改元上書言三事皆報可四年致仕家居二十餘年屏迹不及公府故廬栽蔽風雨伏臘不充景泰初卒

明史

蕭省身泰和人與昌祺同舉永樂進士洪熙元年布政

考滿當給誥命奏父年八十餘願以給父帝嘉而許之

後遂爲例居河南十二年治行與昌祺等明史李昌祺傳謝志舊

案豫章書省身由庶吉士改刑部主事進郎中擢河南右藩卒年甫五十君子惜之

劉叔慈廬陵人初爲沅陵知縣縣介溪洞困徭役者悉

竄山谷叔慈至計其丁資而役之流亡復業有爭訟不

治以法爲開諭再三心服而後遣之升北京行部員外

時新置行部兵饑之後庶務叢脞工曹尤甚叔慈以廉

勤著尋升辰州府同知及建北京宮殿率郡民就役卒

於北京民之在役者歸時載其喪葬辰州分省人物考

羅汝敬名簡以字行復仁孫永樂進士選庶吉士就學

文淵閣累遷侍講仁宗時上言時政十五事忤旨下獄

既與李時勉同改御史直聲震一時宣宗初上書大學

士楊士奇謂車駕幸天壽山躬謁二陵京師之人瞻望
咨嗟以爲天子大孝旣而道路喧傳禮畢卽較獵講武
扈從惟也先土干與其徒數百人風馳電掣馳逐先後
其聞此言心悸膽落夫以謁陵出而與降將較獵於山
谷閒垂堂之戒銜檠之虞不可不深慮也執事四朝舊
臣二聖元輔於此不言則孰得而言之者惟特加采納
以宏靖獻之思光弼直之義尋擢工部右侍郎兩使安
南還督兩浙漕運理陝西屯田多所建置督餉遇敵紅
子城中流矢墜馬得免以疾告歸卒

明史羅復仁傳
白志舊案林志汝

敬名肅與此不同登科錄
永樂甲申進士有羅汝敬

李時勉名懋以字行安福人永樂進士選庶吉士進學
文淵閣與修太祖實錄授刑部主事復與重修實錄書

成改翰林侍讀三殿災詔求直言條上時務十五事成祖決計都北京而時勉言營建之非忤帝意被譏下獄歲餘復職洪熙元年復上疏言事仁宗怒甚召至便殿對不屈命武士撲以金爪脇折者三曳出下錦衣獄時勉於錦衣千戶某有恩千戶適莅獄密召醫療以海外血竭得不死宣宗卽位踰年復官修成祖實錄成遷侍讀學士帝幸史館撒金錢賜諸學士皆俛取時勉獨正立帝乃出餘錢賜之正統三年進學士掌院事兼經筵官六年代貝泰爲祭酒九年帝視學時勉進講尙書辭旨清朗帝悅賜予有加連疏乞致仕不允十二年乃得請朝臣及國子生餞都門外者幾三千人卒年七十七謚文毅成化五年以其孫容請改謚忠文贈禮部侍郎

明史白志舊案時勉初入翰林與陳敬宗同官袁忠徹常相之曰二君他日名位相埒後果各爲南北祭酒終明之世稱賢祭酒者曰南陳北李云
吉州人文紀略時勉名聰與此傳異

王芳孫字濫淵安福人官山東河南布政清慎自持璽書衰之子高亦以進士官至福建右布政使居官四十餘年清慎如其父人咸重之

林志

劉髦字孟恂永新人少時卽通經史大義嘗受易於廬陵謝子方永樂間舉於鄉講學石潭從游甚眾事母以孝稱少師楊士奇重之所著有易傳撮要修身箴覆瓿集石潭存藁以子定之貴贈司經局洗馬

明一統志謝志

王直字行儉泰和人永樂進士選庶吉士授修撰歷事仁宗宣宗累遷少詹事兼侍讀學士正統三年進禮部侍郎學士如故五年出莅部事尙書胡濙悉以部政付

直處之若素習者八年代郭璉爲吏部尙書帝將親征也先直率廷臣力諫不從命直留守京師王師覆於土木大臣羣請太后立皇太子命郕王攝政已勸王卽位以安反側議上皆直爲首而直自以不如于謙每事推下之加太子太保景泰元年也先使使議和且請還上皇下禮部議未決直率羣臣上言宜從其請遣使往報因察其誠僞而撫納之乃遣李實羅綺往已而楊善竟奉上皇還三年進少傅帝欲易太子未發會思明土知府黃玪以爲請帝喜下禮部議文武諸臣議者九十一人當署名直有難色陳循濡筆強之乃署竟易皇太子景帝疾亟直等請復立沂王爲皇太子推大學士商輅草疏未上而石亨徐有貞等奪門迎上皇復位直遂乞

休給驛歸天順六年卒年八十四贈太保諡文端子積

仕翰林檢討亦以學行稱曾孫思自有傳

明史

朱與言字一謬萬安人永樂進士累官南京都察院右

副都御史上疏論時弊極痛切上皆納之未幾乞休家

居肅然如在官韓雍巡按江西尙嚴憚焉

林志

張宗連字重器吉水人永樂進士選庶吉士授刑部主

事仁宗卽位擢左中允會詔羣臣舉所知禮部郎中況

鍾以宗連名上擢南京大理丞宣德元年詔遣吏部侍

郎黃宗載等十五人出釐各省軍籍宗連往福建明年

坐奏事忤旨謫常州同知朝遣御史李立理江南軍籍

檄宗連自隨立受黠軍詞多逮平民實伍宗連數爭之

立怒宗連輒臥地乞杖曰請代百姓死初宗連使廣東

務廉恕至是見立暴橫積不平疽發背卒常州民白衣

送喪者千餘人爲建祠

明史

蕭時中名可以字行廬陵人永樂辛卯進士第一授翰

林修撰奉天殿災陳言八事極盡時弊善導婉諷上嘉

納焉嘗預修四書五經性理大全諸書

豫章書

蕭不敏時中之兄守身立學有名事母盡孝以詩經薦

旣上春官會時中充考官避嫌不入歸而教授鄉里

明一

統志

劉咸字士皆泰和人永樂進士歷官河南按察副使改

廣東時營繕北都被命董運木料卒於官文章政事俱

有名於時著有河南咏古集虛庵集

豫章書

劉麟應字顯人安福人父環紹興太守麟應蚤孤廢學

隨族人商於廣解縉外貶道廣一見奇之勉令就學麟
應感激勵志學以大成永樂進士由庶吉士授修撰以
疾懇歸

豫章書

錢習禮名幹以字行吉水人永樂進士選庶吉士授檢討
與紳子甯姻戚既仕鄉人以奸黨持之楊榮言於帝
帝笑曰使子甯在朕猶當用之況習禮乎仁宗卽位遷
侍讀知制誥以省親歸宣德初召還進侍讀學士英宗
開經筵爲講官擢學士掌院事七年以故鴻臚寺爲翰
林院落成諸殿大學士皆至習禮不設楊士奇楊溥坐
曰此非三公府也正統九年乞致仕不許擢禮部侍郎
力辭不允王振用事達官多造其門習禮恥爲屈復上
章乞骸骨乃得歸習禮篤行誼動有矩則卒年八十有

九諡文肅

明史

陳賞字公延泰和人繼先子永樂進士擢廣西僉事守官清苦卒無以爲殮同官周之始得返喪著有橋梓後

集

白志

陳正倫吉水人永樂進士爲御史斥蠹蝥奸務愜民心累遷陝西四川按察使政益嚴整姦貪巨猾不敢蹈故智以自逞楊士奇最重之稱爲畏友

白志

歐陽和字允和泰和人永樂進士授御史居官寬厚坦亮太宗亟稱之曰歐陽御史真識大體者升雲南副使

卒

林志

羅通字學古吉水人永樂進士授御史巡按四川三殿災偕同官何忠等極陳時政闕失忤旨出爲交趾清化

知州宣德元年黎利反圍清化通堅守乘間出破賊殺傷甚眾賊知城不可拔引去及還京宣宗獎勞之改戶部員外出理宣府軍餉正統初遷郎中坐事下獄景帝監國以于謙陳循薦起兵部員外郎守居庸關進右副御史也先犯京師別部攻居庸甚急天大寒通汲水灌城冰堅不得近七日遁走追擊破之景泰元年召入參贊京營軍務兼理院事給事中覃浩等言通本以知兵用不宜理院事乃解其兼職通本于謙所舉而每事低梧人由是不直通東宮建加太子少保四年進左都御史天順初致仕卒

明史 謝志舊案豫章書云宏治十八年追錄己巳保障功臣救建祠居

庸關以祀通劉晉卿羅少保易名詩序云土木之變破敵保塞恢復京師與于忠肅共成中興之業爲犁庭以

來第一戰功其後觀象前知而恥與奪門之事以左都

御史屢疏請致仕此段舊志不詳附錄於此 謹案明

史本傳天順初自陳預謀迎駕恐為石亨所掩乃授其二子所鎮撫則肥與奪門之事亦劉序妄譽矣

彭勛字祖期永豐人永樂進士親老乞近地以養除南雄府教授學舍後有祠數現光怪學官弟子率禱祀勛撤而焚之滿考補建甯教授朱子故宅有祠無祭勛疏請春秋祭蠲子孫徭又勸尊賢堂祀胡安國蔡沈真德秀諸生翕然嚮學正統元年以楊士奇薦召拜御史初設提學官命督南畿學校詳立教條士風大振又請設南京諸衛武學所至葺治先賢墳祠母憂歸起復改吏部考功郎中出為山東副使土木之變數言兵事以直不容於時致仕歸

明史

孫鼎字宜鉉廬陵人永樂舉人歷松江教授正統八年楊溥薦為御史董南畿學置本源錄錄諸生善行行部

不令人知單輿猝至諸生謁輒閉門試之卽日定甲乙諸生試歸榜已揭通衢請託者無所措手通州旱饑奏蠲糧三千四百餘石英宗北狩鼎試罷謂諸生曰故事當簪花宴今臣子枕戈之秋不敢陷諸君不義設茗飲步送諸門旣而詣闕上書請隨所用效死不報未幾以親老致仕知府張瑄疏言鼎孝追曾閔學繼朱程宜起居論思之職不允天順元年卒於家人稱貞孝先生

彭勛劉觀二傳

李昉字宗昉吉水人由太學生除行在吏部主事宣德二年征交趾兵部尙書李慶贊軍務昉以文學參謀死

國事

安志

陳循字德遵泰和人永樂十三年進士第一授翰林修

撰進侍講宣德初受命直南宮日承顧問賜第玉河橋西正統元年進學士九年入文淵閣典機務初廷議時政三楊主之至是榮士奇已卒循及曹鼐馬愉在內閣帝以楊溥老宜優閒令循等預議明年進戶部右侍郎兼學士土木之變人情洶懼循居中所言多采納進戶部尚書也先犯京師請敕各邊精騎入衛馳檄回番以疑敵帝皆從其計景泰二年進少保兼文淵閣大學士加兼太子太傅進華蓋殿大學士英宗復位杖循百戍鐵嶺衛循在景帝朝嘗上勤政要典請發帑給貧民因事進言多足採者其嚴譴則石亨輩爲之非帝意也亨等敗詔釋爲民一年卒成化中循子請卹乃復官賜祭

胡種吉水人永樂間以廕補翰林檢討進侍講正統間忤中貴王振謫戍於邊天順改元上察其忠鯁召還復

官

林志

楊黻吉水人永樂進士授御史仁宗卽位上疏言十事

擢衛王府右長史盡心獻替未嘗苟取一錢宣德初卒

林志謝志舊案白志作楊黼林志人物志皆作黻字民服考登科錄永樂乙未進士有楊黻無楊黼今從林志

廖謨字文績泰和人永樂進士官河閒知府多惠政有

古循良風嘗任刑部主事福建僉事以明刑著稱

明一統志

周勉字功懋號雪坡吉水人學士敘之兄少與敘同學

銳然有用世志以父命總理家事四十年周氏五世同

居食指千二百餘公私出入皆所經畫孝友本諸天性

所著有雪坡詩集

石溪集

江西南昌府

周敘字功敘吉水人年十一能詩永樂進士選庶吉士作黃鸚鵡賦稱旨授編修歷官侍讀直經筵正統八年夏上言比天旱陛下責躬虔禱而臣下不聞效忠補過之言掌銓選者罔論賢否第循資格司國計者不問耕桑惟勤賦斂軍士困役作刑罰失重輕風憲無激揚言官惟緘默僧道數萬日耗戶口流民眾多莫爲矜恤帝以章示諸大臣王直等皆引罪求罷十一年遷南京翰林侍講學士郕王監國條上八事王嘉納之敘以宋遼金三史體例多未當疏請重修詔許自撰詮次數年未及成而卒

明史

彭琉字毓敬安福人永樂進士時營建北京委琉督軍

夫於畿內督運木於山東皆如期而集大學士楊士奇
薦之授翰林編修預纂宣德實錄出爲廣東山西督學
改副使參贊廣西軍務引疾歸自少至老讀書不倦所
著有息庵集慎庵集備忘錄

豫章書

尹鳳岐字邦祥吉水人永樂進士由庶吉士官至侍讀

爲文章有法度根理據義磊落奇偉

明一統志

曾泉字本清泰和人永樂進士選庶吉士改御史宣德
初謫汜水典史卒正統四年河南參政孫原貞上言泉
操行廉潔服官勤敏不以降黜故有偷惰心躬督民間
荒土收穀麥伐林木備營繕通商賈完逋責官有儲積
民無科擾有羨餘矣然後造舟楫置棺槨贍民器用百
姓婚喪不給者咸資於泉卒之日老幼巷哭臣行部汜

水泉歿已三年民懷其惠言輒流涕雖古循吏何以加

宜下詔褒美追復泉爵褒既往以風方來帝從之明史府志

郭循字循初廬陵人永樂進士擢刑部主事錄囚南京

於枉抑多所伸雪宣德中拓西內皇城修離宮循疏諫

逮入面詰之抗辯不屈下之獄英宗即位復官進郎中

改工部擢廣東參政有勦寇功景泰初卒循溫厚詳明

表裏洞澈見苛刻者每曰此輩自絕生理得以是微名

干祿初不知召天之譴也明史陳祚傳林志

曾鶴齡字延年永樂辛丑及第第一人授修撰歷升侍

講學士子蒙啟蒙簡皆舉進士蒙簡擢御史卓有風裁

蒙簡子追進士及第官編修鶴齡所著有松坡集臞叟

集豫章書

劉子輔廬陵人永樂閒由國子監生擢御史巡按浙江

性廉平浙人德之遷廣東按察使坐累左遷交趾諒江

知府善撫循其民黎利反與守將集兵民死守九閱月

城陷子輔曰吾義不汙賊刃卽自縊死一子一妾皆死

事聞贈布政司參政遣官賜祭復其家

明史人物志

艾鳳翔吉水人永樂進士任工部主事上章乞歸養遂

奉親終身日肆力於學四方從游者甚眾

林志

歐陽哲字廣哲泰和人永樂進士官浙江僉事轉河南

副使上疏言漕河利害上嘉納之賜以文綺厯官四十

年以清介著所著有雪坡集

人物志

萬節字資中安福人永樂進士官至廣西按察副使探

執不苟莅事詳審非人所易及

明一統志

劉球字求樂安福人永樂進士授禮部主事胡濙薦侍
經筵與修宣宗實錄改翰林侍講正統六年帝以王振
言大舉征麓川球上疏諫章下兵部謂已有成命不用
球言八年五月雷震奉天殿球應詔言所宜先者十事
下廷議惟擇太常官宜從初球言麓川事振固已銜之
欽天監正彭德清者球鄉人也素爲振腹心倚勢爲姦
公卿多趨謁球絕不與通德清恨之遂摘疏中攬權語
謂振曰此指公耳振益怒逮下詔獄屬指揮馬順殺球
順深夜攜一小校持刀至球所球方臥起立大呼太祖
太宗頸斷體猶植遂支解之瘞獄戶下後其子鉞求得
一臂裹裙以殮球死數年英宗北狩振被殺朝士立擊
順斃之德清自土木遁還下獄論斬景帝憐球忠贈翰林

林學士謚忠愍立祠於鄉球二子長鉞次鈺皆篤學躬耕養母球既得卹兄弟乃出應舉先後成進士鉞廣東參政鈺雲南按察使

明史

劉廣衡字克平萬安人永樂進士正統閒以刑部郎中出修浙江荒政積粟數百萬督治陂塘爲旱澇備景泰初厯左副都御史鎮守陝西請遇災傷毋俟勘報卽除其賦庶有司不得借覆核陰行科率從之福建浙江盜起命往督捕議創壽甯縣於官臺山以清盜窟討平處州賊居官以廉節稱終刑部尙書

明史劉玉傳府志

李信圭字君信泰和人洪熙時舉賢良授清河知縣縣瘠而衝官艘日相衝役夫動以千計前令請得沭陽五百人爲助然去家遠艱於衣食信圭請免其助役代輸

清河浮征三之二兩邑便之俗好發冢縱火信圭設教
戒十三條令里民書於牌月朔望儆戒之且令書其民
勤惰善惡以聞俗爲之變宣德八年上言自江淮達京
師沿河郡縣悉令軍民挽舟若無衛軍則民夫盡出有
司歲發二三千人晝夜以俟而上官又不分別雜泛差
役一體派及致土田荒蕪民無蓄積請自儀真抵通州
盡免其雜徭俾得盡力農田兼供夫役從之自是他郡
亦蒙其澤正統元年擢知蘄州清河民詣闕乞留命以
知州理縣事十一年冬尙書金濂薦擢處州知府其在
清河已二十二年矣處州方苦旱信圭至輒雨未幾卒
於官清河民立祠祀之

明史

江西通志卷一百四十七

江西通志卷一百四十八

列傳十五

吉安府四

明

蕭鉉字孟勃泰和人宣德進士需次於家八年帝命楊溥合選三科進士拔二十八人爲庶吉士鉉爲首授編修正統三年進侍讀久之代李時勉爲國子監祭酒景泰元年以老疾辭監丞鮑相率六館生連章請留明年以本官兼翰林學士入直文淵閣進戶部右侍郎易儲議起鉉曰無易樹子霸者所禁矧天朝乎不聽加太子少師寶宇通志成進戶部尙書帝不豫諸臣議復憲宗東宮李賢私問鉉鉉曰旣退不可再也英宗復位遂削籍天順八年卒成化中復官賜祭

明史陳循傳
舊案蕭鉉鵬舉子
白志

蕭啟字斯暘龍泉人宣德進士累官僉都御史巡撫山西減冗軍以甦民困募富民以實邊儲凡政有利害罷

行惟宜

人物志

劉儁永新人宣德進士授御史升按察僉事所至風采凜然嘗稱學莫先於義利之辨著有木庵集

人物志

吳節字與儉安福人宣德進士由庶吉士官至侍讀學士己巳之變條陳十餘事皆國家大政多見采納爲南祭酒督修國學廟廡成降詔褒之歷任太常卿致仕年

八十五卒

人物志

劉實字嘉秀安福人宣德進士選庶吉士正統初授金華府通判仍歲荒旱請蠲租且贖還饑民子女義門鄭氏族大不能自給又買馬出丁供山西郵傳困甚亦以

實言獲免母喪歸廬墓三載起順天府治中景泰時召修宋元通鑑綱目天順四年知南雄府商稅巨萬舊皆入守橐實一無所私中官至南雄入譖言誣奏實毀救大不敬逮下詔獄實從獄中上書言臣官三十年未嘗以妻子自隨食粗衣敝爲國家愛養小民不忍困之以是忤朝使帝覽書意稍解且釋之而實竟瘐死南雄人哀而祠之孫丙自有傳

明史

廖莊字安止吉水人宣德進士選庶吉士授刑科給事中振荒陝西全活甚眾遷南京大理左少卿景泰五年七月上疏曰臣曩在朝見上皇遣使冊封陛下每遇慶節必令羣臣朝謁東廡恩禮隆洽羣臣皆感歎謂上皇兄弟友愛如此今陛下奉事上皇願時時朝見南宮或

講明家法或商略治道歲時令節俾羣臣朝見以慰上皇之心則祖宗在天之心安天地之心亦安矣太子者天下之本上皇之子陛下之猶子也宜令親儒臣習書策以待皇嗣之生使天下臣民曉然知陛下有公天下之心豈不美與疏入不報明年帝憶莊前疏廷杖八十謫定羌驛丞天順初召還仍官南京就擢禮部右侍郎改刑部成化初召爲刑部左侍郎逾年卒贈尙書諡恭

敏

明史

萬壽安福人宣德進士授陽朔知縣至則令民墾土田春耕時具酒脯躬自勸勞建新學選秀民親加誨訓嫁娶葬祭教之皆有品節民俗爲之一變

人物志

蕭維禎廬陵人宣德進士累官刑部尙書性瓌偉而才

充敏爲法官數十年練達事體老於斷案諸法吏皆屈

服之

林志

尹昌字輯禎吉水人宣德進士官行人司正己巳之變扈駕北征知勢不可爲自刎死景帝立降敕褒美錄其

子爲國子生

明史王佐傳林志

李紹字克述安福人宣德進士入翰林爲庶吉士賜詩勉勵累官學士擢禮部右侍郎纂修大制作多出其手致政家居廷議起爲祭酒未赴而卒初英廟復辟有邀迎駕功者強與俱紹辭曰諸公自足辦之何有於紹及拜侍郎冢宰王翱舉酒酬曰李公天選侍郎也蓋譏一時附勢倖進者

林志

曾暈字時升泰和人宣德進士授刑部主事進員外郎

中擢廣西右參政尋以憂去服闋起官河南御史清軍者利得軍多枉及民輦辨釋甚眾南陽諸府多流戶眾議驅逐人情惶急輦撫安之遷山東右布政使民墾田無賦者奸民指爲閒田獻諸戚畹部使者來勘輦曰祖制民墾荒田永不科稅奈何奪之使者奏如言乃免召拜刑部左侍郎尋巡撫浙江考察官吏奏罷不職百餘人他弊政多所釐革還朝久之謝病去

列卿錄謝志舊案林志所載

曾輦宦蹟與列卿錄全不同又吉州人文紀略稱其致仕二十餘年清風雅操足繼楊文貞而優游林泉則兼文貞所無之樂晚年自號龍坡居士

蕭璉字孟奎泰和人宣德進士初爲刑部郎中受命總督修城調度經畫有方厯官禮部侍郎改南吏部左遷湖廣布政司參議

林志

劉益吉水人宣德進士授兵科給事中封駁彈劾務存大體己巳之變上命往山東招募民兵以備邊防官至祭酒卒

人物志

鍾同字世京永豐人父復宣德進士歷翰林院修撰與劉球善球上封事約復與俱妻勸止之球詣復邸邀偕行復已他往妻從屏間嘗曰汝自上疏何累他人爲球出嘆曰彼乃謀及婦人遂獨上奏竟死居無何復亦病卒妻深悔之每號慟曰早知爾曷若與劉君偕死同幼聞母言卽感奮思成父志嘗入吉安忠節祠見所祀歐陽修楊邦乂諸人嘆曰死不入此非夫也景泰二年舉進士明年授御史遇事敢言懷獻太子旣薨與郎中章綸早朝語及沂王皆泣下因與約疏請復儲略曰太子

薨逝足知天命有在上皇之子卽陛下之子沂王天資
厚重足令宗社有託伏望擴天地之量敦友于之仁蠲
吉具儀建復儲位疏入帝不懌越數日綸亦疏言復儲
遂並下詔獄明年八月封巨梃就獄中杖之同竟死時
年三十二同之上疏也策馬出馬伏地不肯起同叱曰
吾不畏死爾奚爲者馬猶盤辟再四乃行同死馬長號
數聲亦死英宗復位贈大理寺左丞諡恭愍從祀忠節
祠與球聯位竟如同初志

明史

陳文字安簡廬陵人鄉試第一正統元年進士及第授
編修十二年命進學東閣秩滿遷侍講景泰二年閣臣
高穀薦文才遂擢雲南右布政使雲南產銀民間用銀
貿易視內地三倍隸在官者免役納銀亦三之文曰雖

如是得無傷廉乎損之復令減隸額三之一名譽日起
遷廣東左布政使母憂未赴英宗復位召爲詹事入侍
東宮講讀進禮部右侍郎兼學士入內閣憲宗立改吏
部左侍郎成化元年進禮部尙書英宗實錄成加太子
少保兼文淵閣大學士成化四年卒贈少傅諡莊靖文
素以才自許在外頗著績效士大夫多冀其進用旣參
大政無所建明歿後陸淵之等疏論其不當得美諡帝
以事已施行不許

明史

劉定之字主靜永新人幼有異稟父授之書日誦數千
言舉正統元年會試第一殿試及第授編修京城大水
應詔陳十事留中十三年弟寅之與鄉人相訐辭連定
之下獄得白秩滿進侍講景帝卽位復上言十事帝優

詔答之三年遷洗馬右庶子天順改元調通政司左參議仍兼侍講尋進學士太常少卿直經筵成化二年以本官入直文淵閣進工部右侍郎江西湖廣灾有司方徵民賦以定之言停徵進禮部左侍郎五年卒官贈禮部尙書諡文安定之謙恭質直以文學名一時嘗有中旨命制元宵詩內使卻立以俟據案伸紙立成七言絕句百首又嘗一日草九制筆不停書有質宋人名字者就列其世次若譜系然人服其敏博

明史

李左修吉水人福建僉事正統六年謫戍威遠衛以經學淑人都御史孫祥布政司郭紀皆受業於其門

山西通志

梁棨字叔車泰和人正統進士累官浙江布政使入覲恩賚甚隆清操粹行爲時稱最滿九載卒於官著有松

軒集

白志

蕭翼字體全永新人正統進士知潛山教民種芋民因謂之蕭公芋改知長垣黃河漂民舍十常八九翼浚河築隄身先眾役發粟賑貸踰二稔而水定任滿特恩褒嘉升順德知府

白志

陳宜字公宜泰和人正統進士任工科給事嘗建言省迎春冗費以千計遂著爲令累官副都御史巡撫貴州轉兵部左侍郎卒爲人謹厚有德望而經術尤正

林志

劉鎔字用甫泰和人正統進士任刑部主事條陳十四事皆見采納歷陝西山東僉事調雲南旣歸清約如貧士

明一統志

周鐸字秉訓萬安人正統進士累官廣東布政使以清

慎勤著聲所至有遺愛

明一統志

左鼎字周器永新人正統進士授御史巡按山西時英宗北狩兵荒洊臻請蠲太原諸府稅糧停大同轉餉夫以蘇其困也先請和抗言不可尋以山東河南饑遣鼎巡視民賴以安景泰四年以災異偕同官陳救弊恤民七事未言大臣不乏奸回宜黜罷其尤用清政本帝善其言下詔甄別乃論吏部尙書何文淵通政使李錫等不職狀錫罷文淵致仕鼎居官清勤卓有聲譽御史練綱以敢言名而鼎尤善爲章奏京師語曰左鼎手練綱口出爲廣東參政英宗復位爲左僉都御史踰年卒

羅如壩字本崇廬陵人正統進士授行人己巳與司正尹昌扈駕北征瀕行訣妻子誓以死報國屬翰林劉儼

銘其墓儼驚拒如墉笑曰行當驗耳後數日果死景泰

閒詔旌其忠錄一子入太學

明史王佐傳人物志

劉觀字崇觀吉水人正統進士年方少忽引疾告歸尋
丁內艱服除終不出杜門讀書求聖賢之學四方來問
道坐席嘗不給縣令劉成爲築書院於虎邱山名曰養
中平居端坐無懈容或勸之仕不應作勤儉恭恕四箴
以教其家取呂氏鄉約表著之以教其鄉族有孤嫠不
能自存者周之或請著述曰朱子及吳文正公之言尊
信之足矣復何言吳與弼其鄰郡人也極推重之觀前
有孫鼎廬陵人稱爲貞孝先生又有李中吉水人號谷
平先生在觀後是爲吉水三先生

明史謹案白志觀號臥廬先生孫鼎李

中皆白有傳

劉玘字求素安福人忠愍球之弟從忠愍授春秋登正統進士第授莆田令在邑九載績滿當去民詣三司乞留者以萬計不果入爲刑部主事升員外有胡指揮者因妻姦謀殺人玘論其罪死其人素附貴幸改讞於錦衣衛坐玘以故入罪謫戍遼陽在遼五年日以文章自抒寫題其集曰養晦卒於戍所

彭文思公集

張洪安福人正統進士以御史扈從土木死景帝追卹之錄其子爲國子生

明史王佐傳人物志

曾蒙簡名廉鶴齡子正統進士歷官浙江按察使剖決如流政聲大著所著有介庵集

林志

王概字同節廬陵人正統進士授刑部主事歷郎中出爲湖廣參政調河南所至郡縣無留牘獄無冤詞遷按

察使天順初被誣繫獄襄憲王入朝言其冤上立命法
司雪概還任尋升右副都御史巡撫陝西改大理卿出
入七年凡兩法司及畿藩讞奏參錯情法多所平反成
化八年遷刑部尚書卒官諡恭毅子臣成化進士翰林

侍講

吉州人
文絕略

劉孜字顯孜萬安人正統進士授御史出按遼東景帝
卽位有建南遷議者孜馳奏乞斬言者以定人心期滿
當代朝議邊務方殷孜能懾服將吏復留一歲再按畿
輔時方築滄州城以孜言罷擢山東按察使俄遷左布
政使明年春以右副都御史巡撫江南十府蘇松財賦
自周忱立法後代者多紛更孜首訪忱遺規斟酌行之
民稱便拜南京刑部尚書致仕道卒

列卿
錄

楊渙字德濟泰和人正統進士知四會縣有惠政搖峒率聽約束地產斷腸草頑民逞忿者取食之以死誣人渙下令訟者入其草連根者若干乃與理久之其種遂絕後卒於廣東僉事

林志

彭時字純道安福人正統十三年進士第一授修撰明年郕王監國令同商輅入閣預機務時聞繼母憂力辭不允乃拜命釋褐踰年卽秉政前此未有也尋進侍讀遷左春坊大學士天順元年仍命入閣兼翰林院學士閣臣自三楊後進退禮甚輕爲帝所親擢者惟時與岳正二人而帝方嚮用李賢數召賢獨對賢雅重時退必咨之時引義爭可否或至失色賢初小忤久亦服其諒直曰彭公眞君子也憲宗卽位議上兩宮尊號中官希

周貴妃旨言錢后久病不宜稱太后而貴妃帝所生母
宜獨上尊號傳旨子爲皇帝母當爲太后豈有無子而
稱爲太后者宣德閒有故事時曰今日事與宣德閒不
同胡后表讓位退居別宮故正統初不加尊今名分固
在安得爲比中官厲聲怵以危語時拱手向天曰太祖
太宗神靈在上孰敢有二心錢皇后無子何所規利而
爲之爭義不忍默者欲全主上聖德耳若推大孝之心
則兩宮並尊爲宜賢亦極言之議定及將上寶冊時云
兩宮同稱則無別錢太后宜加兩字以便稱謂乃尊爲
慈懿皇太后貴妃爲皇太后數日中官覃包至閣曰上
意固如是但迫於太后不敢自主非二公力爭幾誤大
事禮成進吏部右侍郎兼學士成化改元進兵部尙書

英宗實錄成加太子少保兼文淵閣大學士四年慈懿太后崩詔議山陵時及商輅劉定之言太后作配先帝梓宮當合葬裕陵主當祔廟此不易之禮諸大臣相繼言之帝猶重違太后意時偕朝臣伏文華門泣請帝與太后皆感動始從時議改吏部尙書十一年以秩滿進少保踰月卒年六十贈太師諡文憲時立朝三十年孜孜奉國有古大臣風

明史

羅俊字永彥泰和人正統進士任御史厯官潯州知府蠻獠向化郡大稱治改南雄公廉寬厚有古循吏風

明志

劉昇永新人領正統鄉薦甯藩器之請爲己用遣官諭意昇不可明年中進士授翰林院編修居翰苑年餘剛

果無附刻意問學年三十而卒人咸惜之

人物志

劉儼字宣化吉水人正統七年進士第一授修撰歷官太常少卿兼侍讀景泰中典順天鄉試黜大學士陳循王文子幾得危禍天順初改掌翰林院事卒官贈禮部左侍郎諡文介儼立朝正直居鄉亦有令德在翰林時奉旨修五倫書歷代君鑑宋元通鑑綱目後人輯其撰述爲文介集

明史周叔傳
列卿錄

張達字時達泰和人正統進士授工部主事諫興佛塔出視漕運適歲饑發粟以振活民數千進光祿卿升工部侍郎卒於官

安志

張金陵字承翰吉水人正統進士授監察御史風裁嚴峻以劾都御史周銓不法謫柳州雷塘驛丞安遠侯柳

景總戎廣西以象州屢爲猺獞侵擾民無甯居起金陵署州事既至爲立信設法揭榜撫諭猺獞解散民安生業交章薦知太平府事以母喪去官

廣西通志

蕭暉字仰善泰和人由進士官湖廣左布政使天順四年舉治行卓異召拜禮部尙書初兩京尙書缺多用布政使爲之自暉後遂無拜尙書者暉重厚廉靜有方面聲及居禮部疏於政體又不善奏對帝不懌調南京

錄

列傳

路璧安福人正統進士由給事中歷福建左布政先是閩人貢獻供億均取八郡不計大小璧視民數爲差等而均其役又歲徵稅價輸京師吏胥因緣爲奸悉釐革之以病去

福建通志

謹案謝志路璧後有彭華傳所引人物志亦云華與萬安劉吉皆因李致省

以致大位考明史攷省傳華實以執政大臣附麗攷
省志僅載其厯官亦並無善迹依謝志尹直例刪

劉敷字叔榮永新人景泰進士授御史巡江時同差錦
衣官虐民敷奏革之出爲湖廣僉事厯布政使升巡撫

討平苗寇召還爲都御史

人物志

歐陽顯嘉吉水人景泰進士除工部郎擢知銅仁府狷
介有執持扶獎善類不事搏擊時邵署燬於苗顯嘉捐
俸營建不以累民

貴州通志

張業安福人景泰進士由庶吉士授檢討預修英廟實
錄一統志歲旱奉命祀中嶽海瀆應期雨降升司業凡
八年坐註誤落職士論惜之業所著有書經節傳禮記

節疏

白志

王臣字克賓吉水人景泰鄉舉南京監察御史奉命巡

解池鹽屏奸盜時出納近池地侵於土人者悉清理還之官周池築垣塹一百二十里塹外爲堰堰下置邏卒鋪二十四所曲盡良法奸盜無所逞商賈便焉國課日充事聞璽書褒嘉未幾卒於官今解州有忠愛祠正德間賜額

白志

劉宣字紹和安福人父戍盧龍早世宣代往因爲衛學生在行伍中不廢學舉景泰庚午鄉試第一明年成進士選庶吉士授編修爲經筵講官英廟實錄成升右庶子進南太常少卿掌國子監祭酒由吏部侍郎陟南工部尙書歲餘以疾卒性耿介疾惡不少徇多知國家典故爲文以理勝不喜新奇所著名冲澹集正德中謚文

懿白志謝志舊案舊志有尹直傳末附李致省以進公論難掩又列卿錄謂直所著項綴錄力詆吳興

弼諸勝已者悉加
媒孽不當載今削

劉鈺字伏和球子景泰進士擢御史出按閩中時巡方
多務擊搏鈺獨慎憲度理冤獄察吏治寬和有制鎮守
中官誣奏都指揮僉事錢輅反以兵圍其第鈺奏解得
釋汀州豪欲奪人墳不與則懇於朝以地當產天子英
宗遣中貴會鈺驗之鈺辨其誣寘豪於理累官雲南按
察使有中官遣郭景取捷徑往安南假朝命求賂安南
知其詐縱之還遣兵尾其後將近邊郭給其部長請入
白守關者脫歸鈺捕之郭懼赴井死逮治其黨遣人諭
安南以禍福遂退邊境以安

福建通志
雲南通志

伍驥字德良安福人景泰進士授御史天順七年巡按
福建先是上杭賊起都指揮僉事丁泉善捍禦賊屢攻

城皆爲所卻已而賊轉熾驥聞立馳入汀州單騎詣賊壘從容立馬諭以禍福賊見其至誠感悟泣下歸附者千七百餘戶給以牛種俾復故業惟賊首李宗政負固不服遂與泉深入破之泉力戰爲賊所害驥弔死恤傷敵以忠義復與賊戰連破十八砦俘斬八百餘人四境悉平而驥冒瘴癘成疾班師至上杭卒軍民哀之爲立祠成化中以知縣蕭宏請詔與泉並祀賜祠名褒忠子希閔成化進士歷官福建僉事再平上杭巨寇民德之並祠焉姪希淵天順進士官至廣西布政希齊宏治進士終黃州推官一門俱有治績

明史白志

陳儼字時莊廬陵人景泰進士累官貴州巡撫興利剔弊惟恐不及西堡寨苗弗馴往諭之歸化者半有終弗

率者請於上躬擐甲冑搗其巢號令嚴明信賞必罰於是憑崖伏洞者望風請降或持牛酒詣軍門羅拜捷聞賜敕褒嘉仲子景從軍有功弗報將佐請遣之奏捷亦不聽官至南刑部侍郎

貴州通志

李鈞永新人景泰進士官工科給事中憲宗卽位數月與同官王徽王淵朱寬李翔疏陳四事末言宦官奸邪者多毋令預聞國政其冬復與徽等劾中官牛玉詔謂妄言邀譽欲加罪言官交章論救乃並謫州判官鈞得綏德州以判官終

明史王徽傳

劉珂字本佩安福人景泰進士歷官廣東布政初宰麻城嘗因五蛇入庭而伸五人橫死之冤在山西發倉振饑活人無數

林志

劉璧廬陵人景泰進士以御史出知漳浦興學校立社

倉清丈履畝定則田賦悉清民尸祝之

福建通志

傅韶字德音永豐人景泰進士歷刑部郎中剛明有執
時太廟被盜竊金盆西臺繫至數百人韶承命往勘廉
得真盜誣逮者悉免知黃州益勵清操力折豪強庶務

修舉

人物志

王用泰和人景泰進士官至河南布政嘗巡按蘇松斷
決如流獄無阻滯貪墨望風知懼

明一統志

康驥字德良泰和人景泰進士監察御史天順初闕宦
竊弄威福驥抗章論其奸狀羣小泣訴於上乃下驥獄
拷掠備至而詞氣侃侃不撓後復巡按山東北直隸所
至風紀肅然吏民畏懾

林志

楊琚字朝用泰和人景泰進士兵部主事轉郎中紀功
陝西奏改延綏城堡悉陳軍民利病多見采納尋升參
議奉命撫治荆襄築老龍隄疏竹筒河開剏郟陽厥功
尤多

林志

阮玘字廷用安福人天順進士授行人所至不辱命
拜監察御史貪暴不敢肆侵漁革築隄運河決隄令有
司與民爲期約民悅事集尋以巡視鹽場冒暑得疾至
京卒殮殯不能自舉鄉舊共賻僅得歸櫬玘平生篤行
動以古人自期孝友尤爲人所重

明一統志

羅璟字明仲泰和人天順進士及第授翰林院編修充
經筵講官命纂續通鑑綱目成進司經局洗馬時李孜
省惡不附己陰中傷之調南京部屬轉福建提學副使

家宰王恕薦爲南京國子祭酒後以疾乞歸著有冰玉

集

人物志

蕭禎字彥祥泰和人天順進士累官副都御史巡撫陝西升南京工部侍郎轉刑工二部尙書以疾致仕禎操持廉潔尤精吏事所至有聲

林志

彭教字敷五吉水人天順八年進士第一授翰林修撰預修英廟實錄書成進侍講拜白金文綺之賜主試南宮時稱得人侍講經筵銳意輔導其文章秀發多奇氣而典則森嚴所著有瀧江集

吉州人文紀略

張敷華字公實安福人御史洪之子少負氣節景泰初錄死事後入國學舉天順進士選庶吉士成化元年與劉大夏願就部曹除兵部主事歷郎中廉重不撓出爲

浙江參議居浙十餘年歷布政使宏治初遷湖廣歲饑
令府縣大修學宮以備直資饑者擢右副都御史巡撫
山西改撫陝西製婚娶喪葬之式納民於禮妖僧據終
南山廷議用兵尙書馬文升曰張都御史能辦此敷華
果以計縛僧遷兵部右侍郎改右都御史總督漕運兼
巡撫淮揚諸府高郵湖隄圯浚深溝以殺水勢又築寶
應隄民利賴焉改掌南京都察院與吏部尙書林瀚僉
都御史林俊祭酒章懋稱南都四君子就遷刑部尙書
正德元年召爲左都御史其冬大臣與言官請去劉瑾
等內閣力主之帝猶豫數華乃上言陛下宴樂逸遊日
狎愴王政令與詔旨相背行事與成憲交乖致天變上
干人心下拂國家大事百人爭之不足數人壞之有餘

願陛下審察疏入不報既而宦官勢益張除夕朝罷忽傳旨與楊守隨俱致仕數華即日就道瑾恨未已坐數華奸黨與守隨等榜名朝堂明年卒瑾誅贈太子少保諡簡肅孫鼂山官御史

明史

伍希淵字孟賢安福人天順進士仕刑部員外郎錄南直浙江繫囚多所平反出爲廣州同知承檄勦後山劇寇有功句稽軍籍陳便宜二十事御史爲下列郡行之

人物志

羅倫字彝正永豐人成化二年廷試對策萬餘言直斥時弊名震都下擢進士第一授翰林修撰踰二月大學士李賢奔喪畢奉詔還朝倫詣賢沮之不聽乃上疏劾賢謫福建市舶司副提舉亡何賢卒以學士商輅言召

復原職改南京居二年引疾歸遂不復出倫爲人剛正
嚴於律已里居倡鄉約相率無敢犯以金牛山人迹不
至築室著書其中四方從學者甚眾卒年四十八嘉靖
初從御史唐龍請追贈左春坊諭德諡文毅學者稱一
峯先生

明史

龍文字彥祥泰和人歷官文選司郎中以清慎著天順
初升南京工部侍郎卒

明一統志

劉遜安福人成化進士爲御史首劾巨璫蔣琮不法十
事下詔獄謫澧州判官遷式岡知州復以裁抑岷府祿
米被誣逮繫謫四川斷事升湖廣副使劉瑾索賂不得
又以他事逮獄罰米百石勒致仕瑾誅復官歷福建按
察使遜三繫獄而直節始終不回天下想望風采焉

明史

姜綰傳
人物志

李貢字惟正吉水人成化進士歷官都御史會流賊猖獗出入畿甸貢嚴甲令謹斥埃有王指揮者內結錢糧外與賊通貢廉得其狀召至詰責使禽賊以自效賊平乃寘之法擢兵部右侍郎以忤權貴意累疏乞歸卒

人物志

劉喬字述憲廣衡子成化進士擢監察御史按畿內八郡獨持風裁歷湖廣右布政廉明益著因奉命祀南嶽

卒

林志謝志舊案劉喬舊志訛喬白志據登科錄改正喬端毅公王之父也

周淵字本深廬陵人成化進士授鄭州知州率民墾荒地數百頃導河流漑之授以手激法民利頓興巡撫李炎以暴刻陵長吏淵獨不爲屈所著有一谿集

人物志

周孟中字時可廬陵人成化進士歷官副都御史性剛毅重名節嘗講學白鹿洞來學之士每至數十人聽受問難娓娓不窮所著有畏齋集

人物志

劉震字道亨安福人成化壬辰進士及第歷官南京祭酒性剛毅恥於詭隨爲文敏瞻雄健所著有雙溪集

林志

王禎字維禎吉水人省之孫成化初由國子生授夔州通判二年荆襄石和尚流劫至巫山督盜同知王某者怯不救禎卽代勒所部民兵晝夜行至則城已陷賊方聚山中禎擊殺其魁餘盡遁乃行縣撫傷殘招潰散久乃得還甫三日賊復劫大昌禎趣同知行不應指揮曹能柴成與同知比激禎曰公爲國出力肯復行乎禎卽請往兩人僞許相左右禎上馬挾兩人與俱夾水陣旣

渡兩人見賊卽走禎被圍半日誤入淖中賊執欲降之大罵賊怒斷其喉及右臂而死從行者奉節典史及部卒六百餘人皆死自死所至府三百餘里所乘馬奔歸血淋漓毛盡赤眾始知禎敗往覓屍面如生子廣鬻馬爲歸貲王同知得馬不償直觀旣行馬夜半哀鳴王起視之馬驟前齧項搏其胸翼曰嘔血死人稱爲義馬事聞贈禎僉事錄一子

明史 白志 舊案人物志云禎成化中鄉舉 謹案林志禎歿贈

州同知誤

馬鉉字孔任永新人成化進士授工部主事遷員外改儀制司郎中上章糾內臣權傾中外天下喪氣異流左道欺罔聖德虧損蓋指斥汪直李孜省之輩疏入上震怒逮獄大學士劉珝申救還職未幾擢南太僕寺少卿

調廣西參議適古田賊勢告急鉉矢志戡亂不避險阻
初與賊遇斬獲過半窮追遇伏死之提學副使周孟中
親爲求屍七日乃得身無完膚事聞敕賜祭葬錄一子

入國學特詔桂林府建忠臣廟歲時致祭焉

吉州人文紀略

張黻字兼素吉水人成化進士官後軍都督府經歷刑
部主事林俊以請斬妖僧繼曉並罪中貴梁芳下詔獄
黻救之亦下獄太監懷恩力救俊謫姚州判黻師宗知
州時言路久塞兩人直聲震都下爲之語曰御史在刑
曹黃門出後府黻厯知涪州宿州介特不避權貴宏治
中俊蒙顯擢而黻老不用王恕爲之請特予誥命

明史林俊

傳人
物志

鍾鯨廬陵人成化鄉舉知新興縣故事縣官率詣大府

歲倍馬夫直以進鯨曰剝下以奉上吾不爲也卒以正額上之守怒誣下獄當道廉得其實欲更其縣鯨曰以爲有罪誠願斥罷若無罪何必更竟卒於官

人物志

彭禮字彥恭安福人成化進士授兵部主事歷官太僕少卿上言自古牧馬多在監苑未聞寄養民間今寄馬駒歲課無窮而民間戶丁生長有限以有限之丁責無窮之駒困何由蘇請定種馬之額爲十萬歲取駒二萬五千高壯者備歲用不堪者變價贖太僕寺如有倒斃卽令買補可爲久遠之計兵部奏行之於是兩京種馬始有定額宏治五年升太僕寺卿擢工部侍郎以副都御史巡

原誤總

撫蘇松應天等處致仕卒

分省人物考

劉戡字景元安福人成化進士授編修進侍講孝宗朝

使交趾餽遺一無所受交人爲建卻金亭於思明道中

後以春坊右諭德終所著有晉軒集

林志

曾彥字士美泰和人成化戊戌進士第一時年幾六十
祭酒邱濬書歸第綵旗對云江右賢科十回虎榜魁天
下西昌文運三應龍洲過縣前都人榮之官至南京翰
林學士預修憲廟實錄其爲文不事刻削而思致綿邈
自不可及

明一統志

劉彬字素彬永豐人成化進士授程鄉縣令考績赴部
老稚追攀道左彬曰若等無慮吾行不出半年耳去未
三月鄰邑饒平賊發城陷官軍屯程鄉彬過家臥病聞
之卽力疾陸趨四日及境爲白行軍布政陶魯軍眾邑
小乞散之鄰邑以紓民困陶擒賊五百餘多濫入者彬

力言於巡按御史雪脅從者過半九載考績布政劉大
夏署云無能事之虛名有牧民之實惠後進朝請大夫
人物

志

劉鴻字雲表泰和人成化鄉舉兩擬春官第一才名達
禁中憲宗賜以巾曰遮暘免其家徭役邱濬倪岳戴珊
皆與爲忘分交所居七星坳自號七星居士詩文集十

二卷

激水
志林

歐陽旦字子相安福人成化進士由休甯令擢御史請
逐劉吉罷皇莊召還言官姜洪等厯湖廣僉事浙江副
使終南京副都御史居官三十餘年清節一致弟哲字
子履甲辰進士廣東提學僉事才行相伯仲

明史姜洪
傳林志

劉丙字文煥實之孫成化進士選庶吉士改御史巡按

雲南歷官湖廣巡撫錯溪苗龍麻陽與銅仁苗龍童保
四出劫掠丙討之破其數寨擒童保者三百人又破鎮
篁諸寨擒麻陽等百六十人餘賊遠遁遷工部右侍郎
採木入山越二載得疾卒贈尙書諡恭襄

明史

王懋中原名中立字與時安福人成化進士宰南樂累
官南京右都御史當鎮撫滇南時不避權貴奏免場課
數事忌之者眾遂上疏乞歸宸濠叛懋中倡集義兵告
變於巡撫王守仁知府伍文定協力討平之乃詔起於
家所著有心遠集

人物志

曾望宏泰和人成化進士歷刑部郎中凡諸司掣肘者
大司寇悉付之曰非曾郎中不可有駙馬奏爭民田望
宏廉得其實悉歸之民又出誣執左道百餘勘中貴官

與皇親互訐事各斂服尋擢知常州至則表節義抑強

豪勸農造士政治卓然有聲

人物志

龍伯泰和人成化進士知慈谿縣恤民勵俗葺先賢祠

宇雪理沈冤禱雨龍見

林志

曾顯泰和人成化鄉舉知靖州廉明勤慎節用愛人興

利除弊靖人懷之立去思碑於州治萬曆三年提學副

使陳允升題允崇祀

湖廣通志

袁道字德純吉水人性剛介清苦力學成化進士知宜

興太平二縣擢御史巡按廣東至則斥賊吏搜奸弊諸

大吏皆凜凜相戒政暇請謁陳獻章於嘉會樓經旬不

倦尋以疾卒於龍川獻章作詩哭之稱真御史

安志

胡準安福人成化舉人知嘉州州舊無城值盜起其震

驚準調集鄉兵築城編巨木爲柵附以石盜不得入并

免水患卒於官民祠祀之

四川通志

伍符安福人希淵子成化進士知甯波府才猷敏練不畏權勢有貴家壻暴橫殺人符盡發其奸置之法擢四川右布政歷直隸巡撫會武宗南巡武臣劉暉宦官張忠並以寵倖前驅竊弄威福符正色與抗左右共嫉之駕旋有銀章之賜

直隸通志
浙江通志

劉孟字子賢安福人成化進士歷諫垣十五年剛直敢言常劾文武官不職者五十六人皆罷之壽甯侯壻錢銘怙寵滋惡孟具疏直糾寘於法復請罷鎮守太監免爲地方之害疏勘三大營互爭接壤民田九百頃爲草場歸之民升福建左參政平白水峒劇寇升僉都御史

撫延綏逆瑾賁賂逮獄濱死廷臣相率申救罷歸

人物志

徐穆字舜和吉水人宏治進士授翰林院編修分校會試名士多出其門充正使頒詔朝鮮穆至正迎見之儀拒饋獻遠人畏服逆瑾惡不已附調南京兵部員外瑾誅還職進侍讀學士而卒

林志

周魯字純夫吉水人宏治進士授監察御史糾彈不避時有以司馬遷冢宰者十三道以爲不可欲言之而無旨當先者魯曰言官畏言邪卽首署其名冢宰憾之後與都御史論差法不合遂乞休去

林志

趙璜字廷實安福人少從父之官墜江中不死中宏治進士授工部主事改兵部歷員外郎出爲濟南知府豪猾吏舞文璜擇愿民教之律令得二十餘人返吏而代

之漢庶人牧場久籍於官募民佃德王府奏乞之璜勘
還之民閭七年政績大著正德初擢順天府丞未上劉
瑾惡璜坐巡撫朱欽事逮下詔獄除名瑾誅復職遷右
僉都御史巡撫宣府尋調山東曲阜爲賊破林廟在曠
野璜請移縣就闕里從之擢工部右侍郎總理河道以
邊警改理畿輔兵備嘉靖元年進尚書劉瑾創元明宮
糜財數十萬瑾死奸人獻爲皇莊帝卽位斥以予民旣
而中旨令仍舊璜言詔下數月而忽更示天下不信帝
卽報許三年顯陵司香內官言陵制狹小請改營視天
壽山諸陵璜言陵制與山水相稱難槩同帝納其言已
帝欲遷顯陵璜不可乃寢爲尚書六年值帝初政銳意
釐剔中官不敢撓故得舉其職後論執不已諸權倖嫉

者眾帝意亦寢疏璜素與秦金齊名考察自陳與金俱致仕馳驛給夫廩如故事璜有幹局多智慮事棼錯他人相顧愕眙璜立辦既去人爭薦之十一年召復故官未上卒贈太子太保諡莊靖

明史

劉桐永新人宏治鄉舉知泰順持法嚴平聽斷明允悉民隱省繁費尤加意士類嚴斥羣小勾攝無一卒下鄉

民賴以安

浙江通志

劉玉字咸栗萬安人宏治進士授輝縣知縣發粟振饑奏蠲虛稅復業者千家擢御史初孫伯堅金琦王甯皆以傳奉得官已又以指揮胡震爲都指揮王抗疏言傳奉不已繼之內批累聖德乞皆罷之不納武宗卽位甫四月災異迭見玉陳修省六事劉健謝遷罷玉馳疏言

劉瑾等佞倖小臣巧戲弄投陛下一笑顧譏邪而棄輔臣此亂危所自起乞置瑾等於理仍留健遷輔政不報遂引疾歸後瑾榜玉奸黨復誣搆之罰輸粟塞下者三最後逮繫詔獄削籍放歸瑾誅起河南僉事遷福建副使皆董學政累擢南京右僉都御史提督江防宸濠反攻安慶玉以舟師赴援事定改撫鄖陽世宗卽位進右副都御史歷刑部左右侍郎初偕九卿爭興獻帝不宜稱皇及考獻帝又偕廷臣伏闕哭爭六年秋坐李福達獄削籍卒於家玉所居僅庇風雨天文地理兵制刑律皆有論著隆慶初贈刑部尚書諡端毅子愬南京工部右侍郎歷官亦有聲

明史

鄒賢字恢才安福人宏治進士授南京大理評事數有

條奏時頗稱之歷官福建僉事禽殺武平賊渠黃友勝

居家以孝友稱

明史鄒守益傳

羅僑字維升吉水人受業張元禎講學里中宏治進士除新會知縣有惠愛正德初入爲大理評事京師旱蠲上疏曰臣聞人道理則陰陽和政事失則災沴作願陛下慎逸遊屏玩好放棄小人召還舊德與在廷臣工宵旰圖治并敕法官慎守成律卽有律輕情重者亦必奏請裁決毋擅有輕重庶可上弭天變下收人心時朝士久以言爲諱僑疏上自揣必死輿輓待命劉瑾大怒矯中旨詰責數百言令廷臣議罪大學士李東陽力救得改原籍教官其秋瑾敗尋召復官引病去宸濠反王守仁起兵吉安僑首赴義世宗卽位卽家授台州知府建

忠節祠祀方孝孺詢民間疾苦歲時循行阡陌課農桑
講明冠昏喪祭禮境內大治擢廣東左參政僑辭部牒
敦趣不得已之官踰年遂謝病歸

明史

羅欽順字允升泰和人宏治六年進士及第授編修遷
南京國子監司業與祭酒章懋以實行教士未幾奉親
歸因乞終養劉瑾怒奪職爲民瑾誅復官遷南京太常
少卿再遷南京吏部右侍郎入爲吏部左侍郎世宗卽
位命攝尚書事上疏言久任超遷法當疏通不報大禮
議起欽順請慎大禮以全聖孝亦不報遷南京吏部尚
書省親乞歸改禮部尚書會居憂未及拜再起禮部辭
又改吏部下詔敦促再辭許致仕有司給祿米時張璁
桂萼以議禮驟貴秉政樹黨屏逐正人欽順恥與同列

故屢詔不起里居二十餘年潛心格物致知之學專力於窮理存心知性初由釋氏入既悟其非乃力排之著困知記自號整庵年八十三卒贈太子太保謚文莊明史

陳鳳梧字文鳴泰和人宏治進士授刑部主事清甯宮災應詔言時政奉命江南審錄重囚多所平反出爲湖廣提學僉事推行聖制爲十八條刊示郡縣歷升山東左布政使卒贈工部尚書著有奉議修辭錄毛詩集解

困知記

人物志

彭龍龍泉人宏治鄉舉授東昌判時馬政久敝馬戶率多流散龍至條奏馬政五事極言俵馬賁駒均役安民之方下其議行之

人物志

蕭乾元字必克萬安人宏治進士爲御史上疏數宦官

劉瑾等奸狀忤旨廷杖幾死瑾誅起福建兵備僉事寢建甯軍士之變正建安匿喪之罪升雲南副使尋引疾

去

人物志

劉潮字主信安福人宏治進士授大理評事歷廣西按察副使平賓州八寨劇盜有功先是宸濠殺長史莊典妻子無所歸潮買地居之時宸濠威制豫章道路以目或危之潮不爲動

府志

劉子厲安福人宏治進士授嘉善令入爲監察御史逆瑾執柄斥不附已誣逮下獄落職瑾敗起按福建尋卒

人物志

羅欽德字允迪泰和人與弟欽忠同登宏治進士其時兄欽順官翰林三羅之名隱隱在公卿間咸欲識其爲

人欽德深避不欲接款遂除外任有清名中涓豪猾聞風斂迹性孝友得請歸侍父几杖依依若孺子其母所製布履易簪時命納諸棺以殉

豫章孫章書

彭杰字景俊吉水人宏治進士歷四川參政督餉討甌寇師捷宣慰使冉儀所部縱掠且叛杰諭定之升雲南湖廣布政使二省鹽法宗祿多羨餘人咸藉以自利杰一無所取黔國公沐紹勛禮絕方岳杰與之分庭相抗武定侯郭勛鎮楚藩梟不敢馳中道杰奪門而入其剛勁多類此

吉州人文紀略

劉昭字仲賢廬陵人宏治進士正德末宸濠叛王守仁起兵進討過吉州與郡守伍文定延昭入幕與參謀議宸濠伏誅錄昭功力辭不受守仁遺書曰東征之役執

事贊襄之力居多而絕口不肯言功豈常人所能著有

東崖傳東征忠義錄

豫章書

羅善字復之安福人宏治進士爲諸生時有從游者必告以孝弟廉恥爲基趾基趾不堅雖富貴終且傾仆厯官陝西僉事會逆瑾葬其父馬嵬坡下過者率致祭祭必以文達瑾善獨不顧而去旣歸月朔望必正衣冠率子姓會中堂講小學數條且考論月中臧否叱罰其不率教者

豫章書

李勳字功大吉水人以歲貢上禮部授新野訓導時河南大饑流移載道令不能救勳捐粥賑之多所全活升淮王右長史王禮意稍衰遂棄官歸

人物志

劉教字道夫安福人宏治鄉舉厯刑部主事知梧州丁

繼母憂服闋遂不仕在刑曹時貴溪夏言分宜嚴嵩柄政既同鄉又於嵩爲同年生引嫌不往見值巨璫子弟殺人同官疑憚不爲訊教論如法告致歸田與周祿陳家謨訂西原惜陰之會著有蒼梧芝亭藁

人物志

曾直字叔溫吉水人宏治進士歷知鄞新城二縣擢工部主事調刑部升郎中忤大閹張銳引疾去嘉靖初用薦起知肇慶府累官大理少卿都御史彭澤將復哈密爲中人所構下獄直判以誣忠勤大臣法在必誅士魯番復賄內外以計逐直遂再乞歸性喜讀書自經史至於星歷地理譜牒咸有著論所著凡十餘種卒年八十

餘

石蓮集

羅循字遵道吉水人宏治進士歷武選郎中會考選武

職有指揮二十餘人素出劉瑾門循罷其管事瑾怒罵尚書王敞敞謝曰郎中輩爲之又罵曰不能制郎中安用尚書敞益懼歸部趣易奏循退遲之數日而瑾敗敞乃謝循歷知鎮江淮安二府升徐州兵備副使咸有聲

自志

徐威字廣威泰和人宏治鄉薦授郕西教諭成化中桑民懌分教泰和廣威受業門下取其古賦字棘喙不能句者爲之疏通箋注持論宏肆與民懌略相似

列朝詩傳

羅璞字宗溫吉水人宏治鄉舉授紹興府同知出已意創造歸衛歸姓二冊當道善之下其法於列郡知思南

府平苗賊米魯等有功擢貴州參政致仕歸

人物志

賀寬永新人宏治進士知東陽廉明慈愛教養兼舉歲

早減膳徒跣拜禱又借運司鹽帑及郡倉粟以賑全活甚眾及報政囊橐蕭然士民交相餽贐寬惟取一菜時人謂曰昔聞劉寵一錢今見賀寬一菜

浙江通志

王思字宜學太保直曾孫也正德進士改庶吉士授編修九年乾清宮災應詔上疏謂勿以遇災而懼災過而弛庶可享天心保天命其年九月帝狎虎而傷閱月不視朝思復上封事謫潮州三河驛丞王守仁講學贛州思從之遊及守仁討宸濠檄思贊軍議世宗嗣位復故官加俸一級尋充經筵講官嘉靖三年與同官屢爭大禮時張璁桂萼方獻夫爲學士思羞與同列疏乞罷歸不許其年七月偕廷臣伏左順門哭諫帝大怒繫之詔獄杖三十踰旬再杖之思與同官王相給事中張原等

十七人皆病創先後卒隆慶初贈右諭德

明史

劉哲字公望安福人滁州學正嘗奏請專敕憲臣以提督學政從之升鄭府長史王欲廢嫡立庶哲極諫王始迫以刑中誘以利終怵以亡身破家之禍哲曰身可殞家可破此倫不可紊密疏以聞遣官勘如奏遂冊立其嫡長之賢者改哲遼府長史

林志

伍箕安福人正德進士知華州爲政平恕民有犯先以理論動其良心使自媿悔不悛者然後加以刑強宗豪猾莫不感服及審戶役均徭賦民食其德至今誦之

陝西

通志

甘公亮字欽采永新人正德進士授兵部主事上疏乞改南便養在刑曹讞獄明允爰書成憫悼每形諸色時

乾清宮災率同列陳八事雖未行士論壯之出守惠州
罷橋鐵稅攻破賊巢奏設和平縣州賴以甯公亮生平
爲學沈潛義理而以孝友力踐爲宗有懷金求銘者亮
察知其人曰吾雖貧不能爲人諛墓也

豫章書

蕭晚字啟旦吉水人正德進士授南刑部主事以持法
律忤近貴而大閹高隆不勝忿誣奏晚待理久之尚書
李承勳爲白其冤得免累官至布政使

人物志

劉廷簠字器重安福人正德進士知杞縣入爲御史歷
按兩浙閩貴行部郡邑單車徑往州長吏而下咸敬憚
之

人物志

李宗栻字敬甫安福人七歲時與羣兒戲父怒取紙幅
畫爲百空格跪之祠下責之曰汝不願則遣汝農願則

書願字百棧乃蒲伏握筆作九十九字而書其尾曰學未就不敢盡書遂自勵於學扁其室曰寤室容止食息必以古聖賢爲則性尤孝動循古禮服勤浣濯必勞力不敢委人日有錄自考其心之隱微

分省人物考

李中字子庸吉水人正德進士楊一清爲吏部數召中應言官試不赴及授工部主事武宗自稱大慶法王建寺西華門內用番僧住持廷臣莫敢言中拜官三月卽抗疏請毀佛寺出番僧妙選儒臣朝夕勸講攬大權以絕天下之奸建儲位以立天下之本革義子以正天下之名則所謂振紀綱勵風俗進君子退小人諸事可次第舉矣帝怒罪且不測以大臣救得免踰日中旨謫廣東通衢驛丞王守仁撫贛州檄中參其軍事預平宸濠

世宗踐祚復故官未任擢廣東僉事再遷廣西提學副使三遷廣東右布政使忤督撫坐事降四川參政十八年擢右僉都御史巡撫山東歲歉令民捕蝗者倍予穀蝗絕而饑者濟進副都御史總督南京糧儲卒光宗時追謚莊介中少學於同里楊珠既而擴充之沈潛邃密學者稱谷平先生門人羅洪先王龜年周子恭皆傳其

學明

史

李楷字邦正中族人傳羅洪先之學由舉人授湯溪知縣母艱服闋補青田時倭躡東南楷積穀資守禦青田故無城倭至楷禦於沙埠倭不得渡乃以閒築城倭又至登陴守日殺賊數人倭遁去改知昌樂亦以治行聞

明史李
中傳

鄒守益字謙之賢之子正德六年會試第一出王守仁門廷對第三授翰林院編修踰年告歸謁守仁講學於贛州宸濠反與守仁軍事世宗卽位始赴官嘉靖三年二月帝欲去興獻帝本生之稱守益疏諫忤旨被責踰月復上疏帝大怒下詔獄考掠謫廣德州判官廢淫祠建復舊志初書院與學者講授其閒稍遷南京禮部郎中考滿入都卽引疾歸久之以薦起南京吏部郎中召爲司經局洗馬遷太常少卿兼侍讀學士出掌南京翰林院尋改祭酒九廟災守益陳上下交修之道言殷中宗高宗反殀爲祥享國長久帝大怒落職歸日事講學從遊踵至學者稱東廓先生居家二十餘年卒隆慶初贈南京禮部右侍郎謚文莊子善嘉靖進士以刑部員

外郎恤刑湖廣矜釋甚眾擢山東提學僉事時與諸生講學萬厯初累官廣東右布政使謝病歸久之以薦卽家授太常卿致仕

明史

歐陽重字子重廬陵人正德進士殿試對策厯詆闕政授刑部主事劉瑾兄死百官往弔重不往張銳錢甯掌廠衛連搆摺紳獄重皆力與爭銳等假他事繫之獄贖杖還職再遷郎中厯四川雲南提學副使遷浙江按察使未上嘉靖六年拜右僉都御史巡撫應天會尋甸土酋安銓鳳朝文反廷議以重諳滇事乃改雲南賊平重推功於前撫臣傅習緬甸木邦隴川孟密孟養諸酋相讐殺各訐奏於朝下重等勘覆遣參政王汝舟知府嚴時泰等徧厯諸蠻譬以禍福皆還侵地供貢如故重列

善後數事悉報可賜璽書褒諭雲南歲貢金千兩費不
貲大理太和蒼山產奇石鎮守中官遣軍匠攻鑿山崩
壓死無算重皆疏罷之浮費大省當是時鎮守太監杜
唐黔國公沐紹勛相比爲奸利長吏不敢問羣盜由此
起重極言鎮守中官宜革帝頗納其言下詔敕紹勛命
唐還京待勘二人懼且怒遣人結張璉謀去重會以軍
譁被劾解職重不勝忿抗疏劾璉帝以重怨望黜爲民
家居二十餘年言者屢薦竟不復召

明史

劉泉字應占安福人正德進士選庶吉士升編修宸濠
方蓄逆謀泉獨先發其奸激御史蕭淮等劾之世廟繼
統疏陳四事遷湖廣參議卽上疏致仕

人物志

李儼字民望永新人正德進士授行人疏諫南巡忤旨

杖瀕死調國子學正嘉靖初擢監察御史出按應天人
以真御史稱之乞終養遂不復起居鄉倣行藍田鄉約
率里人講學務實行不爲虛論卒祀於社

人物志

王學夔字一卿安福人正德進士爲吏部考功郎建言
罰跪午門廷杖之嘉靖初上謹始疏又疏抑戚畹宥言
官直聲大震歷升湖廣江南巡撫所至俱有平寇功以
兵部尚書致仕家居存問者再卒贈太子少保謚莊簡

府志

王時柯字敷英萬安人正德進士授行人嘉靖三年擢
御史疏言桂萼輩以議禮迎合傳升美官薛蕙陳相段
續胡侍等連章論劾實出至公今佞人超遷而羣賢獲
罪恐海內聞之謂陛下好諛惡直願采忠讜之言消朋

比之禍特寬蕙等而聽席書方獻夫辭職除張璫桂萼
別任則是非不謬人情悅服忤旨切責未幾有伏闕之
事再予杖除名戍邊十四年赦還穆宗卽位復官贈光
祿少卿

明史

劉魁字煥吾秦和人正德中登鄉薦受業王守仁之門
嘉靖初謁選得寶慶府通判歷鈞州知州潮州府同知
所至潔已愛人扶植風教入爲工部員外郎疏陳安攘
十事帝嘉納二十一年秋帝用方士陶仲文言建祐國
康民雷殿於太液池西所司希帝意務宏侈程工峻急
魁欲諫度必得重禍先命家人嚮棺以待遂上章曰頃
泰享殿大高元殿諸工尚未告竣內帑所積幾何歲入
幾何一役之費動至億萬土木衣文繡匠作班朱紫道

流所居擬於宮禁國用已耗民力已竭而復為此不經
 無益之事非所以示天下後世帝震怒杖於廷錮之詔
 獄時御史楊爵先已逮繫既而給事中周怡繼至三人
 屢瀕死講誦不輟繫四年得釋未幾復追逮之魁未抵
 家緹騎已先至繫其弟以行魁在道聞之趣就獄復與
 爵怡同繫又三年同釋尋卒隆慶初贈卹如制明史
 案人物志說以魁為萬歷鄉薦今改正學案載其在獄
 與楊爵山周怡納後諸學凡四年世宗嘉隆間有神降
 三人須臾故釋而後逮又二年高元殿災上復問火中
 呼三人名氏乃放還家事雖近認然忠義之士宜為鬼
 神陰祐也

歐陽鐸字崇道泰和人正德進士授行人上書極論時
 政不報歷工部郎中改南兵部出為延平知府毀淫祠
 數十百所以其村葺學宮司理太監蕭敬家奴殺人置

之法調福州嘉靖三年擢廣東提學副使累遷南京光祿卿歷右副都御史巡撫應天十府蘇松田不甚相懸下者畝五升上者至二十倍鐸令賦最重者減耗米派輕贍最輕者徵本色增耗米陰輕重之賦乃均諸推收因從圩不從戶詭寄無所容州縣荒田四千四百餘頃歲勒民償賦鐸以所清漏賦及他奇羨補之議衛役及裁郵置費凡數十百條民皆稱便遷南京兵部侍郎進吏部右侍郎九廟災自陳去鐸有文學內行修潔仁雖通顯家具蕭然卒贈工部尚書諡恭簡

明史

歐陽嵩字汝中泰和人正德進士知福甯州首開東南河一千八百餘丈灌田數千頃皆爲沃壤復買田建河資倉儲租爲後疏浚費民永享其利

福建通志

劉紳字士鳳永豐人正德進士官郎中廉靜謙約告病歸寓居金牛寺甘貧嗜學始終不改其操著有中龍集

人物志

周尚化泰和人正德進士知邳州時流賊猖獗尚化預築土城捍禦之賊既偪州議者欲闢門固守尚化曰城外非吾民邪乃合城內外居民諭之以義誓共死守賊乃解去升南刑部員外以憂去

人物志

樂鑣字景隆自號雲樵山人正德中諸生與同郡鄒東郭聶雙江講求良知之學時年五十餘矣雅好古文尤

長於詩

大拙堂集

周煦字敬和安福人少孤母許氏年十九厲節孀居煦弱冠領鄉試而母卒及登進士第卽自疏母節於朝詔

旌其門授行人升御史巡按雲貴適土寇犯順雲南巡撫闕煦檄總鎮三司指畫方略討平之事聞璽書獎勵
歷都察院右副都御史卒於官

分省人考

賀鈞字信夫廬陵人正德鄉舉居親喪家人失火鈞亟取累世神主奔出他質一無所問除應天教授日與諸生講學必依於孝弟忠信所著有龍岡摘藁子涇成進士官至廣西按察副使解組歸執贄布衣劉文敏之門

人物志

黃國用廬陵人正德進士官御史嘉靖三年以議禮謫蓮塘驛丞與諸生執經講學官至貴州僉事

廣東通志

尹袞字舜章永新人正德鄉舉授壽甯令召父老牖以至誠作詩歌戶給之遷守綿州公署垣壞得窖金數萬

兩禁家眾勿取登記其數以當歲賦餘以葺城堞人稱

其廉

府志

彭簪字世望安福人正德鄉舉爲衡山令多惠政移倅
常州專務大體攝篆宜興卻例供百金或以爲病後來
者簪曰後令賢必不予非不然吾亦安能以其身預爲
不賢者地改知靖州一月拂袖歸自稱石屋山人與同
郡羅洪先鄒守益日以正學相切劘郡邑長吏莫不式
廬請事居十二年自爲傳志祭文邀同志作別沐浴端

坐逝

人物志

聶豹字文蔚永豐人正德進士除華亭知縣濬陂塘復
業者三千餘戶嘉靖四年召拜御史出爲蘇州知府憂
歸補平陽知府山西頻中寇民無甯居豹令富民出錢

罪疑者贖得萬餘金修郭家溝冷泉靈石諸關隘練鄉
勇六千守之寇卻廷議以豹爲知兵擢陝西副使備兵
潼關大計拾遺言官論豹在平陽乾沒逮下詔獄落職
歸嘉靖二十九年秋都城被寇禮部尚書徐階豹知華
亭時所取士也言其才大可用立召拜右僉都御史巡
撫順天未赴擢兵部右侍郎尋升尚書京師外城成進
太子少傅是時西北邊歲遭兵東南倭寇又起羽書日
數至豹以條奏忤旨降俸二級頃之罷歸數年卒隆慶
初贈少保謚貞襄豹初好王守仁良知之說與辨難益
心服後聞守仁歿爲位而哭以弟子自處及繫獄著困
辨錄於守仁說頗有異同云

明史

張鐸字振大泰和人以貢授鬱林州同知鬱林自昔僻

陋民皆力田鐸爲興學校申教條躬集諸生講諭豐其廩給蠲其徭役由是人知勉學民有兄弟爭訟者鐸諭以大義輒解釋州南有廢地鐸教民耕墾不取其稅荒蕪盡闢田州人爭地相仇殺藩省大臣委鐸同往平之宣朝廷恩德與不忍加兵之意按圖籍攷故實使各循其舊眾皆悅服罷兵七年述職京師歸至郡以疾卒

廣西

通志

劉文敏字宜充安福人自幼樸實不知世有機械事已讀王守仁傳習錄而好之乃入越學於守仁操存克治一息不少懈不應科舉徐階爲學使以貢士徵之不起凡所言論與聶豹相視莫逆人謂豹得文敏而不孤年八十三卒著有論學要語王時槐陳嘉謨賀涇皆門弟

子也

明儒學案

劉秉鑑字遵教宣子正德進士累官刑部員外郎歷大名兵備副使以忤巨奄逮繫謫判韶州量移潮州同知知甯安府初學於湛若水尤篤志於王守仁之學歿時

年未五十

明儒學案

張鼇山安福人正德進士擢御史請建儲諫迎佛論巡山海關章數十皆經國遠猷督學南畿作人稱盛內艱歸適宸濠變從王守仁勤王凡檄奏文移多所草創人志

毛伯溫字汝厲吉水人祖超廣西知府伯溫登正德進士授紹興府推官擢御史嘉靖初遷大理寺丞擢右僉都御史巡撫甯夏改理院事爲趙府宗人祐棟所訐解

官候勘十五年冬禮部尚書夏言以安南失朝貢請討之起伯溫右都御史治兵待命明年安南世孫黎甯遣陪臣鄭惟僚等懇莫登庸弑逆請興師復讐帝疑其不實敕暫緩師而命伯溫協理院事遷工部尚書帝幸承天詔總督宣大山西軍務大同所轄五堡相距二百餘里自巡撫張文錦以築堡致亂後無敢議修者伯溫曰變所由生以任用匪人非建議謬也卒營之邊防賴焉時莫登庸數上表乞降下廷議咸言當討帝從之命伯溫與咸甯侯仇鸞南征伯溫等至廣西部署已定會鸞有罪召還伯溫進駐南甯懸重賞購登庸父子登庸懼遣使乞降伯溫承制許之宣天子恩威納其圖籍并所還欽州四峒地權令還國聽命馳疏以聞帝大悅詔改

安南國爲安南都統使司以登庸爲使世襲伯溫受命
歲餘不發一矢而安南定由帝本不欲用兵故也論功
加太子太保還朝復理院事張瓚卒伯溫代爲兵部議
上防邊二十四事軍令一新上允濫當革者二十餘條
凡錦衣騰驤諸衛御馬尚膳諸監素爲中貴盤踞者盡
在革中帝稱善立命清汰左右近習多不悅二十三年
秋順天巡撫朱方以防秋畢請撤客兵未幾寇大入直
徧畿輔帝震怒斃方杖下削伯溫籍伯溫歸疽發背卒

穆宗立復官賜卹天啟初追諡襄懋

明史

龍光字冲虛吉水人由掾爲縣丞致仕正德丁丑王守
仁開府虔南日與士人談學光子履祥將往光不許履
祥泣請不得已許之數月歸循循如處子光喜曰吾乃

今知王先生因履祥以見執弟子禮守仁悅之留爲參謀會宸濠反光集田僮百十人以從出入帷幄密受方略濠旣禽嘉靖論功賞授直隸滁州判官老於家年八十五卒

豫章書白志舊案龍光事人物志吉安府志俱不載當文成平濠時光實效參謀之力觀文

成與公卿書云致仕縣丞龍光等或詐爲兵檄以提其進止或僞書反間以離其腹心陰謀祕計有諸將士所不與知云云推獎若此修志者詎可因其官小而沒之邪

尹襄字舜弼永新人舉鄉試第一正德進士歷升侍講進司經局洗馬每值經筵意存諷諫一日進講尚書說命至官不及私昵有旨問講章誰爲者人交屬之襄不爲動性醇茂事兄襄尤謹家問起居未敢草一字卒年四十三所著有巽風藁

人物志

楊必進字抑之吉水人正德進士闕略善知兵由行人

歷官廣西按察司副使奉敕整飭府江兵備嶺南猺獞
峒居險阻多賄吏士爲耳目益蔓延不可制合兩廣聚
兵攻古田鳳皇塞三月不下必進猝至其地閱獄出囚
之壯者二百人許其自效陰部勒之夜篝火自閒道
入諸囚斧木仰登出塞後焚其巢都御史蕭翀因以府
江兵備薦自古田告捷諸猺畏之如神必進謂府江箚
密道遠不可驟以兵入宜先以恩信結其心由是諸猺
感激得其死力以爲鄉道岑猛之變畏必進納金三千
有奇求解必進密囊金公帑而佯諾其使意欲以此鉤
猛而忌者疑有所泄遂被論去

廣西通志

戴冠字仲鷗吉水人正德進士授戶部主事憂國用不
足由於冗食遂慨然論列疏略云人主貴藏富於天下

比年逆瑾所籍財產不歸之有司而貯之豹房遂創新庫夫供御之物內有監局外有部司不知此庫何所用之疏入上大怒貶烏石驛丞嘉靖改元起於家仕至提

學副使

吉州人
文紀略

伍全安福人正德進士河東鹽運使饒有幹濟每爲地方興除大利害見鹽場掣支强梁挽起懦者被凌蹙乃分定車戶派以三場序以六班魚貫出入眾論翕然至

今稱便

山西
通志

趙澍安福人官生任姚安知府練達典故州所丁糧徭役悉就釐正祭器射圃經理井然嘗銳意開小井通鹽利爲偏聽者沮抑去之日姚人遮道泣

雲南
通志

江西通志卷一百四十八